

252

Ազատական

ԲԱՐԳԷՆ ՎԱՐԴԱՊԵՏ

142

# Ս. ԷԶՄԻԱԾՆԻ ԿԱԼՈՒԱԾՆԵՐՆ

III

## ՆՐԱՆՑ ԲԱՐԵԿԱՐԳՈՒԹԵԱՆ

### ԾՐԱԳԻՐԸ



ՎԱՂԱՐՇԱՊԱՏ

ԱՆՍՏՐԱՆԻ ՏՊԱՐԱՆ ՍՐԲՈՅ ԷԶՄԻԱԾՆԻ

1908

281.6  
Ա. 47

ԿԱԹՈՒՂԻԿՈՍԱԿԱՆ ԸՆՏՐՈՒԹԵԱՆ ԱՌԹԻԻ

Ս. ԷՋՄԻԱԾԻՆ ԳՈՒՄԱՐՈՒԱԾ

ՀՈԳԵՒՈՐԱԿԱՆ ԵՒ ԱԾԽԱՐՀԱԿԱՆ

ԹԵՄԱԿԱՆ ՅԱՐԳԵԼԻ ՊԱՏԳԱՄԱԻՈՐՆԵՐԻՆ

ՆՈՒԷՐ

### ՅԱՌԱՋԱՐԱՆԻ ՓՈՒՍԱՐԷՆ.

Յառաջաբանի փոխարէն այստեղ առաջ ենք քերում այն՝ ինչ որ խօսել ենք Թիֆլիսում 1907 թ., Հոկտեմբերի 6-ին Ս. Էջմիածնի կալուածների բարեկարգութեան համար զուգարուած ժողովի քացման ժամանակ:

«Ժողովը քացուած համարելով նախ իմ խորին շնորհակալութիւնս եմ՝ յայտնում յարգելի ժողովականներիդ՝ որ յանձն էք առել զուգարուել այստեղ խորհրդակցելու թէ ի՞նչ միջոցներով հնարաւոր է կանոնաւորել Ս. Էջմիածնի կալուածների շահագործման խնդիրը: Թէ Էջմիածնում եւ թէ ժողովրդի զանազան շրջաններում այս խնդիրը վաղուց է ծագել, բայց դժբախտաբար մինչեւ այժմ՝ իւր ցանկալի լուծումս չէ ստացել եւ տակաւին մնում է առկախ Ս. Էջմիածինը սկզբից մինչեւ այժմ՝ եղել է մի կենդրոն, որ յարատեւել եւ գործել է ոչ թէ իւր ներսն ապրող անհատների համար, այլ այն ժողովրդի, որի հետ ապրել է եւ որի ուրախութեան ու տխրութեան միշտ մասնակից է եղել: Մի կողմը թողնենք, թէ որչափով է օգտակար եղել, որքան թերի է կատարել իւր պարտականութիւնները դէպի հայ ժողովուրդը՝ այդ խնդրի լուծումը մեզ հեռուն կը տանէր, բայց փաստն այն է՝ որ Էջմիածինն իւր պատմական դերը կատարել է դէպի հայ ժողովուրդն եւ դեռ եւս ունի կատարելու կարելորդ

դեր, քանի որ արտաքին զանազան աննպաստ հան-  
գամանքներ գոյութիւն ունեն մեր ժողովրդի ինքնուրոյն  
կեանքի զարգացման նկատմամբ:

Ներկայումս որքան որ առաջ գնայ մեր ժողովրդի  
ինքնուրոյն գործունէութիւնը, որքան որ սալակենդո-  
նացումս լինի մեր թեմերում՝ դպրոցների եւ կալուա-  
ծական խնդիրների նկատմամբ, այնուամենայնիւ հար-  
կւոր է մի վարչութիւն, մի կենդրոն, որն իր ձեռքն  
առնի մեր բոլոր դպրոցական եւ կալուածական խըն-  
դիրները, կարգ ու կանոնի տակ ձգի, հրահանգներ  
տայ, ընդհանուր հոգացողութիւն անի, որպէսզի թէ  
մեր դպրոցների կառավարութիւնն եւ թէ կալուածների  
շահագործման խնդիրը կանոնաւոր ճանապարհով ընթա-  
նայ, որպէսզի միատեսակութիւն պահպանուի բոլոր  
վարչութիւնների գործառնութեանց մէջ, եւ ոչ թէ  
անցեալ տարուայ պէս իւրաքանչիւր դպրոց, իւրաքան-  
չիւր վարչութիւն իւր ցանկացած կանոններով առաջ-  
նորդուի եւ պատճառ դառնայ խռովութիւնների՝ խան-  
գարելով դպրոցի խաղաղ կեանքը, իսկ մեր կալուած-  
ներն էլ սպիկար կառավարիչների ձեռքով ոչնչանան  
եւ կորստեան մատնուեն տասնեակ հազարներ: Իսկ  
այդ կենդրոնական վարչութիւնը պէտք է լինի Էջմիա-  
ծինը, որովհետեւ գոնէ առ այժմ՝ այլ կերպ էլ չէ կարող  
լինել, քանի որ մեր բոլոր դպրոցների եւ վանական  
կալուածների կառավարութեան նկատմամբ պետութիւնը  
de jure ճանաչում է իրրեւ սեպհականատէր եւ իրաւա-  
տէր միայն Էջմիածինը:

Ուրեմն եթէ այդպէս է՝ քարոյական պարտակա-  
նութիւն կայ հայ ժողովրդի ձեռնհաս եւ քանիմաց  
մասի վրայ, որ աջակէց լինի այդ հաստատութեան —  
Էջմիածնին, որպէսզի վերջինս անթերի կերպով կա-

րողանայ իւր վրայ դրուած ծանր պարտականութիւնները կատարել յօգուտ դժբախտ հայ ժողովրդի: Ինչպէս Չեզ յայտնի է, Էջմիածնում եղած ոյժերն անբաւարար են կանոնաւոր կերպով առաջ տանելու դպրոցական եւ կալուածական շուրջ ու կարեւոր գործերը, խիստ անհրաժեշտ է այդ հաստատութիւնը զօրեղացնել վերոյիշեալ խնդիրների մէջ հմտութիւն եւ փորձառութիւն ունեցող կարեւոր գործիչների միջոցով, որոնք ձեռք ձեռքի տուած հոգեւոր իշխանութեան հետ կարող կրկինին մեր կեանքի եւ հաստատութիւնների համարեա անկեալ վիճակը բարելաւել եւ ցանկալի չափով իրենց բարձրութեան վրայ դնել:

Խօսքս այժմ Էջմիածնի կալուածների բարեկարգութեան մասին լինելով դառնանք այս կարեւոր խնդրի շուրջը:

Դարերի ընթացքում Էջմիածինը ձեռք է բերել այժմուայ իւր ունեցած կալուածները թէ իւր սեպհական միջոցներով եւ թէ մեծ մասամբ նուիրաբերութեամբ: Հասկանալի է, որ կալուածք նուիրաբերողի նպատակը չէ եղել, որ իւր նուիրած կալուածքի արդիւնքով պահպանուի Էջմիածնի միաբանութիւնը, այլ որպէսզի մեր հոգեւոր վարչական Կենդրոնի միջոցով պահպանուի դպրոցներ, եւ զանազան աստուածահաճոյ հաստատութիւններ, ուրիշ խօսքով ազգային հոգևով լցուած հայն իւր նուիրաբերութեամբ կամեցել է այդ Կենդրոնի—Էջմիածնի միջոցով զարկ տալ հայի կուլտուրական կեանքին: Դժբախտաբար պէտք է ասել որ Էջմիածինն այդ նկատմամբ քաւարար չափով չէ կատարել իւր դերն ու արդար սցրել այդ կալուածները նուիրաբերողների յոյսերը, հազիւ պահպանել է մի ձեմարան, որը միայն 33 տարուայ կեանք ունի,

և որի ծախսերի աչքի ընկնող մասը հոգացումէ Տ. Տ. Գէորգ Դ-րոյ երջանկայիշատակ Կաթողիկոսի հոգացողութեամբ յատկապէս Ճեմարանի պահպանութեան համար թողած արժէքաւոր թղթերի տոկոսներով: Մինչդեռ ասելի պիտի անէր Էջմիածինն և բաց անէր զանազան վայրերում միջնակարգ դպրոցներ, հիւանդանոցներ, ապաստարաններ, որբանոցներ, աղքատանոցներ և այլ հաստատութիւններ: Այդ բոլոր ցանկալի ձեռնարկութիւնները չէ կոչել Էջմիածնի կողմից, որովհետեւ ձեռնհաս չէ կոչել օգտակար ճանապարհով շահագործել մեր ունեցած կալուածներն ու նրանց արդիւնքով իրագործել այդ ամենը:

Սակայն որչափ որ Էջմիածինն է թերացել կատարել իւր պարտականութիւնները, այնչափ էլ թերացել են ժողովրդի ձեռնհաս մարդիկ, որոնք հեռու մնալով այդ հաստատութիւնից, շատ քիչ են հետաքրքրուել նրա ներքին գործերով աջակից չին եղել՝ որ հնարաւոր լինի իրենց խորհուրդներով և անձնական միջամտութեամբ բարւոքել մեր կալուածների շահագործման խնդիրը, որպէսզի ցանկալի արդիւնքը ստանալով կրկնապատկեն և եռապատկեն մեր դպրոցների թիւը, հիմնեն վերոյիշածս կարեւոր հաստատութիւնները:

Ժողովրդի մասնակցութիւնը Էջմիածնի գործերում համարեա թէ չէ երևում, հեռու է մնացել ժողովուրդը Էջմիածնից և միայն անհատները բաւականացել են հնուից երբեմն երբեմն քննադատել: Ժողովուրդի մասնակցութիւնն Էջմիածնի գործերում կարծես միայն երևումէ Կաթողիկոսի ընտրութեան և քաղման ժամանակ: Երբ Կաթողիկոս պէտք է ընտրել՝ ժողովրդից ընտրուած պատգամաւորներն ամեն

կողմերից հաւարում են Էջմիածին, ընտրում են Կաթողիկոս ու հեռանում, մէկ էլ ստանում թէ նրա պէտք է Կաթողիկոսը վախճանուի, որ հաւարունն եւ թաղին: Բայց երբէք հայ ժողովուրդը իւր ներկայացուցիչ պատգամաւորների միջոցով չէ ուզում հետաքրքրուել ու իմանալ, զոնէ առնուազն իւրաքանչիւր 3 տարուց յետոյ, թէ արդեօք իրենց ընտրած կաթողիկոսն իւր հոգեւոր վարիչների հետ միասին ի՞նչ է անում ու Էջմիածնում, քանո՞ւմէ եղածը, պահում է միայն ստացածը, թէ աւելի ծաղկեցնումէ, կամ թէ արդեօք ի՞նչպէս է անօրինում Կաթողիկոսի ինսամբին թողնուած դպրոցական կամ կառուածական խնդիրները, թէ արդեօք Էջմիածին մտած դրամները կանոնաւոր կերպով գործադրում են բուն իրենց նպատակին, թէ մէջ տեղ հարստանում են մասնաւոր անհատների գրպանները, թէ արդեօք դրան կամ ներսի հոգեւոր վարիչներից նրա բարեխղճարար եւ մաքուր կերպով է կատարում իւր պարտականութիւնները իրեն հաւատացած պաշտօնի մէջ եւ այլն եւ այլն: Չէ՞ որ Կաթողիկոսից սկսած մինչեւ եկեղեցու յետին ծառայողը համարումէ ոպատար էկեղեցու — այսինքն ժողովրդի: Բոլորս էլ կոչուած ենք ժողովրդին ծառայելու, ժողովրդի բարիքների համար գործելու, ուրեմն ինչու՞ նոյն ժողովրդից կարգուած չլինեն որոշ մարդիկ, որոնք իրենց ունեցած իրաւունքի համաձայն հաշիւ տեսնելին իրենց կենտրոն Էջմիածնի հետ: Եթէ այդպէս լինէր՝ Խրիմեան Կաթողիկոսի օրօք ստացուած տասնեակ եւ աւելի հազարների արդիւնքը Էջմիածնում կ'երեւար այժմ: Ահա այն ժամանակ հասկանալի կըլինէր, որ մեր եկեղեցին ժողովրդական եկեղեցի է, որ յիշաւի, Էջմիա-

ծինն եւ ժողովուրդը ձեռք ձեռքի տուած առաջ են տանում իրենց գործերը: Բայց դժբախտաբար այդպէս չէ եղել, հոգեւոր իշխանութիւնը գործել է անկախ, իսկ ժողովուրդն էլ մնացել է անտարբեր, խօսքս հարկաւ անհատներէ մասին չէ:

Ասում եմ որ հոգեւոր իշխանութիւնն անկախ է գործել, որովհետեւ հնարաւորութիւն ունենալով իւր անհրաժեշտ ծախքերը հոգալ նրա՞ծ եկամուտներով լո՞ւն է ու աւելին չէ արել իսկ այդ եկամուտները եղել են ոչ թէ հարիւրաւոր դեսեպտին տարածութիւն ունեցող կալուածներից, այլ մեծ մասամբ նուիրաւորամներից, արժէքաւոր տոմներից ստացուած տոկոսներից, վիճակային արդիւնքների մնացորդներից, ուխտատեղիներից, պտղի եւ հոգեբաժին արդիւնքներից (տեսնել արդիւնքների տեսակաւորութիւնն ու քանակը գրքիս մէջ գետեղուած չորս տարուայ հաշիւներից), քայց այժմ այս արդիւնքների մեծագոյն մասը ոչ միայն նուազել, այլ եւ կտրուել է դրսից, հետեւապէս գզալի պիտի լինէր էջմիածնի համար այս ամենը եւ անշուշտ պէտք է լուրջ կերպով ուշ սղրութիւն դարձնէր իւր արժէքաւոր կալուածների վրայ, որպէսզի նրանց շահագործման խնդիրը կանոնաւորելով, կարողանայ հոգալ իւր անհրաժեշտ ծախքերը, չնայած որ վերջերս աւելի կրճատել է այդ ծախքերը: Ահա այդ պատճառով ս. Սինսողը վեհափառ Կաթողիկոսի բարեհաճ համաձայնութեամբ նշանակել է սոյն ժողովը, որ Ձեր միջոցով, իբրեւ մասնագէտ եւ ձեռնհաս անձնաւորութիւնների, հնարաւոր լինի լուծել մեր քաղաքի կալուածների կանոնաւոր եւ արդիւնաւէտ շահագործման խնդիրը: Մայր Աթոռը լիակատար յոյսերով դիմում է Ձեզ, իբրեւ ժողովրդի ձեռնհաս եւ



գիտակից անդամների, որ Չեր օգտակար խորհուրդներով ու գործառնութեամբ իրագործուի մեր արժէքաւոր կալուածների շահագործման խնդիրը, որպէսզի հնարաւոր լինի ոչ միայն հոգալ Էջմիածնի անհրաժեշտ ծախքերը կամ ապահովել Ճեմարանի նիւթական դրութիւնը, այլ եւ մեր բոլոր Թեմական դպրանոցները, որոնց նիւթական վիճակը նոյնպէս աննախանձելի է:

Այժմ պարտք համարելով համառօտակի զեկուցանել Չեզ—յարգելի Ժողովականներիդ—մեր կալուածներից ստացած եկամուտների մասին, առաջուց ներողութիւն եմ խնդրում, որ ինքս չեմ կարող մանրամասն եւ լիակատար տեղեկութիւններ հաղորդել Չեզ որովհետեւ կալուածական բոլոր գործերը, մուտքի եւ ելքի հաշիւները, ապառիկները պահուում են ս. Էջմիածնի Սինօղում, Կոնսիստորիաներում որտեղ դժբախտաբար պահոււմն միանգամայն անկանոն, առանց կանոնաւոր մատեանների ու հաշիւների, որոնց պատճառներն այստեղ քննելով մեզ մեր էական նպատակից հեռու կըտանէր:

Մեր կալուածների շահագործութեան առթիւ պարզած լինելով մեր միտքը, բերելով Թիֆլիսի Ժողովում մեր խօսածը, հարկ ենք համարում այդ բոլորից յետոյ աւելացնել որ մենք յանձն առանք մեր սուղ միջոցներով հրատարակել գրքոյկս,\*) որ միջոց տանք

\*) Այս հրատարակութեան ծախքը պարտաւոր էր էջմիածինն ինքն անել և մենք կրկեսեղէինք այդ դէպքում հաս մեր կալուածների մասին մասնագէտների ձեռքով կազմած գնահատելի Տեղեկագիրներ, բայց ծախքի պատճառով չկարողացանք այդ անել, թողնելով այլ անգամ բոլոր նիւթերը միասին հրատարակել:

այն Հոկտեմբեր ամսի 30-ին Կաթողիկոսական ընտրութեան արժիւ ս. Էջմիածին գումարուած ժողովրդի հոգևարական եւ աշխարհական պատգամաւորներին եւ սոճատարակ այդ խնդրով հետաքրքրուող անձանց ծանօթանալ Մ. Աթոռի կառուածներին եւ նրանց բարեկարգութեան արժիւ կազմուած երկու (Տնտեսագիտական եւ Իրաւական—Վարչական) կարելոր ծրագիրներին ու նրանց շուրջը արծարծուած սկզբունքային խնդիրներին, յոյս ունենալով որ յարգելի պատգամաւորները քացի միայն Կաթողիկոս ընտրելուց՝ մի քանի ժամ կ'նստին կառուածների բարեկարգութեան խնդրին եւ կրնաւստեն ս. Էջմիածին եւ սոճատարակ մեր բոլոր վանքական եւ եկեղեցական կառուածների բարեկարգ շահագործութեան համար Թիֆլիսի Տնտեսագիտական եւ Իրաւական Վարչական Սեկցիաների կազմած երկու կարելոր ծրագիրն իրագործելու։\*)

Որպէսզի ընծ երցողներին միջոց տանք մանրամասն ծանօթանալու Մ. Աթոռի սգարակի տնտեսութեան կցում՝ ննք զբոյլիս վերջում գիւղամտեսս սլ. Կ. Մելիք Շահնազարեանցի կազմած տեղեկագիրը։

**ԲԱՐԳԷՆ ՎԱՐՒԱՊԵՏ ԵՂԱՅԵԼԵԱՆ**

14-ն Հոկտեմբերի 1908 թ.

**ս. Էջմիածին**

\*) «Մշակ» Թերթի 1908 թուի, 8, 12, 13, 14, 16 և 17 համարներում հրատարակեցինք միայն երկու Սեկցիաների կազմած ծրագիրը։

Ս. ՍԻՆՕՂԻ ԿԱՅՍԵՐԱԿԱՆ ՄԵԾՈՒԹԵԱՆ ԻՆՔՆԱ-

Հրաման ՆՈՐԻՆ ԿԱՅՍԵՐԱԿԱՆ ՄԵԾՈՒԹԵԱՆ ԻՆՔՆԱ-  
ԿԱԼԻՆ ԱՄԵՆԱՅՆ ՌՈՒՍԱՅ Ի ԼՈՒՍԱԼՈՐՀԱԿԱՆ ՀԱՅՈՅ ՍԻՆՕՂԷ  
Սրբոյ էջմիածնի անդամոյ Սինօղիս Տ. Բարդէն վարդա-  
պետի.

Ըստ հրամանի ՆՈՐԻՆ ԿԱՅՍԵՐԱԿԱՆ ՄԵԾՈՒԹԵԱՆ  
ի Սինօղիս լուան զեկուցումն յաղագս շահագործելոյ զկա-  
լուածս Մ. Աթոռոյս և վանօրէից: ՀՐԱՄԱՅՆՅԻՆ՝ պատուիրել  
ամենայն Առաջնորդաց թեմից Հայոց, նախ՝ առաքել ի 5 յա-  
ռաջիկայ հոկտեմբերի զմին յանդամոց հոգաբարձութեան  
թեմական դպրանոցի ի քաղաքն Տփլիսիս վասն խորհրդակցու-  
թեան զկանոնաւորութենէ կալուածոց, և քանզի ի թեմին  
Շամախոյ չիք թեմական դպրանոց, ուստի հարկ է առաքել  
զմին յանդամոց հոգաբարձութեան ծխական դպրոցաց Հայոց  
Բագու քաղաքի: Երկրորդ՝ հրաւիրել ի յիշեալ խորհրդակցու-  
թիւնն զկառավարիչս կալուածոց այնց թեմից, յորս գոն  
կառավարիչք, հրահանգելով նոցա բերել ընդ ինքեանս զկազ-  
մեալ մանրամասն փաստացի տեղեկութիւնս, թէ զարդի  
վիճակաց և թէ զեղանակէ ապագայ շահագործման կալուա-  
ծոց, Երրորդ՝ առաջագրել յիշեալ կառավարչաց այժմէն իսկ  
կազմել և բերել ի կազմելի ժողովն ի տես և ի խորհրդակցու-  
թիւն նորին զմօտաւոր տակսացիա—գքանակէ. զորակէ ծառոց  
անտառաց, նոյնպէս և զտեսակէ հանքաց: Չորրորդ՝ ի ձեռն  
Առաջնորդի թեմին Հայոց Վրաստանի առաջագրել կառավարչի  
կալուածոց Մարցայ կազմել նաև զմօտաւոր տակսացիա—  
գքանակէ և զորակէ կալուածոյն Հաղարծնի վանուց և մա-  
տուցանել ժողովոյն: Հինգերորդ՝ ի ձեռն Կոնստանտնուպոլիս  
Երևանայ յանձն առնել կառավարչի կալուածոց Մատուրեանի,

որ յԱրդաքեանդ գեղջ, առանձինն վարձատրութեամբ կազմել զմօտաւոր տակսացիա—զքանակէ և զորակէ անտառին Բջնի գեղջ Մ. Աթոռոյ և առաջի առնել ժողովոյն: Վեցերորդ՝ կարգել ներկայացուցիչ ի կողմանէ Մ. Աթոռոյ զանգամ Սինօզիս զՏ. Բարգէն վարդապետն Աղաւելեան, զի նախագահելով ժողովոյ՝ հրաւիրեցէ ի ժողովն ըսց ի վերոյիշեալ ներկայացուցչաց նաև զյետագայ մասնագէտ անձինս զպարօնայս՝ Պօղոս Ստեփանեան Ղամբարեան, Կոստանդին Միքայէլեան Ալիսանեանց, Սիմէօն Զաւարեան, Աղէքսանդր Քալանթար, Միհրան Անանեան, Աւետիք Սահակեան, Աղէքսանդր Մելիք Աղարեան, Գրիգոր Աղարաբեան, Նիկողայոս Անդրէասեան Քալանթարեանց, Սամսօն Յարութիւնեան, Յովհաննէս Սպենդիարեան և Արշակ Թաղէոսեան: Եօթներորդ՝ զծախս ճանապարհի և այլոց ներկայացուցչաց հոգաբարձութեան Թեմական Դպրանոցաց պարտին առնել ի հաշիւ գրամոց գանձարանի հոգաբարձութեանց, իսկ զնոյնպիսի ծախս կառավարչաց պարտին առնել Թեմակալք ի հաշիւ կալուածական արդեանց: Եւ ութերորդ՝ յանձն առնել անդամոյ Սինօզիս Տ. Բարգէն վարդապետի զարձանագրութիւնս ժողովոյն վաւերացումամբ ստորագրութեամբք անդամոց նորին առանձինն յայտարարութեամբ իւրով առաջի առնել ի վախճանական տնօրէնութիւն Սինօզիս, պատուիրելով գանձապահի Սինօզիս տալ զծախս ճանապարհի և անդեան Տ. Բարգէն վարդապետի վասն երթևեկութեան ի Տփլիսի ըստ վերջին օրագրական կարգադրութեան Սինօզիս: Անկախ զայսմանէ պատուիրել զորձավարի հաշուարարական մասին Սինօզիս քաղել ի գործոց սորին տեղեկութիւնս զմտից և զծախուց յընթացս 1898—1903 ամաց, զորս և յանձնել Տ. Բարգէն վարդապետի: Նոյնպէս պատուիրել զիւղատնտեսի ազարակի Մ. Աթոռոյ կազմել զտեղեկագիր զկալուածոց, որք ընդ հսկողութեամբ նորին, և մատուցանել Սինօզիս: Ի 7 Սեպտեմբ. 1907 ամի ի Ս. էջմիածին:

Անգամ Սինօզի ՅՈՎՀԱՆՆԷՍ ԱՐՔԵՊԻՍԿՈՊՈՍ

Կ. Պ. Ատենապարի Բ. ՂԱՐԻՅԵԱՆ  
Գործավարի Կ. ՏԷՐ ԳՐԻԳՈՐԵԱՆՑ

№ 1872.

ՄԵՐ ՅԱՅՏԱՐԱՐՈՒԹԻՒՆԸ Մ. ՍԻՆՕԴԻՆ.

Ս. Սինօդն ի նկատի առնելով Ս. Էջմիածնի և առհասարակ բոլոր վանքապատկան կալուածների անբարեկարգ վիճակը՝ և որ գլխաւորն է նրանց շահագործման անկանոնութիւնը՝ իւր 3 Սեպտեմբերի 1907 թ. օրագրական վճռով բարեհաճ համաձայնութեամբ ի Տէր հանգուցեալ Վեհափառ կաթողիկոսի՝ նշանակեց Թիֆլիսում ժողով Հոկտեմբերի 5-ին, որպէսզի հնարաւոր լինի այդ ժողովի օգնութեամբ ունենալ մի նպատակայարմար ծրագիր բարւոյնելու և կանոնաւոր կերպով շահագործելու մեր բոլոր կալուածները, կարգելով ինձ ներկայացուցիչ Մայր Աթոռի կողմից և նախագահ այդ ժողովներին:

Համաձայն Սինօդի 7 Սեպտեմբերի 1907 ամի թիւ 1872 հրամանի հետեւեալ ամսի Հոկտեմբերի 3-ին ճանապարհուեցի Թիֆլիս և նախօրօք հրաւէր ուղարկելուց դատ՝ անձամբ ևս եղայ այն բոլոր յարգելի պարոնների մօտ, որոնք Սինօդի որոշման համաձայն պէտք է մասնակցէին յիշեալ ժողովներին, և նրանց համաձայնութիւնը ստանալով՝ սկսուեց առաջին ժողովը Հոկտեմբերի 6-ին և վերջացան նոյն ամսի 28-ին: Ակզբում ունեցանք երկու ընդհանուր ժողով, ապա բաժանուեցին երկու սեկցիայի. ա) Տնտեսական և բ) Վարչական—իրաւական:

Իւրաքանչիւր մասնաժողով (սեկցիա) կազմեց իւր գեկուցումը՝ և ներկայացրեց ընդհանուր ժողովին ի հայեցողութիւն, ունենալով մի շարք ժողովներ: Երկու մասնաժողովների աշխատանքը վերջանալուց յետոյ տեղի ունեցան նորից չորս ընդհանուր ժողովներ, որոնք երկու մասնաժողովների ներկայացրած ծրագիրները՝ քննելուց և որոշ գիտողութիւններ անելուց յետոյ՝ հաստատեցին:

Սինօդի կարգադրութեան համաձայն ներկայ էին թեմական դպրանոցների հոգաբարձութեանց ներկայացուցիչները 1. Երևանից—պ. Պօղոս Կանդուրաբեան, 2. Թիֆլիսից—պ. Նազարէթ Տիգրանեան, 3. Շուշուց—պ. Ասլան Աթաբէգեան, 4. Բագուից—պ. Արամ Առաքելեան և Նոր-Նախիջևանից—Տ. Մուչէ վարդապետ Դանաղեօզեան: Կալուածոց կառավա-

րիչներ ներկայ էին. 1. Մարցի—պ. Սարգիս Սահակեան, 2. Գանձասարի և Խօթայ—պ. Տրդատ Մատինեան, 3. Չարեքայ—պ. Լևոն Տ. Աւետիքեան: Մինօղի որոշման համաձայն ներկայ էին ժողովներին անտեսագէտներ—1. պ. պ. Պօղոս Ղամբարեան. 2. Կոտանդին Ալիխանեանց, գիւղատնտեսներ, 3. Սիմէօն Չաւարեան, 4. Աղէքսանդր Բալանթար, 5. Աւետիք Սահակեան, 6. Արշակ Թաղէոսեան, 7. հանքագէտ—Գրիգոր Աղաբաբեան, իրաւաբաններ 8. Նիկողայոս Քալաթարեանց, 9. Սամսօն Յարութիւնեանց, 10. Յովհաննէս Սպենդիարեան: Բացի յիշեալ պարոններից մասնաժողովները գործի օգտակարութեան տեսակէտից իրենց կողմից հրաւիրեցին մասնակցելու աշխատանքներին նաև պ. պ. Տրդատ Գեօղալեան—գիւղատնտես, իրաւաբաններ՝ պ. պ. Մարկոս Դօլուխանեան, Սենեքերիմ Արծրունի, Յովսէփ Ամիրխանեան, Սմբատ Խաչատրեան, Արշակ Կուսիկեան, Տրդատ Յովհաննիսեան և Սիրական Տրգրանեան:

Գրաւոր գեկուցումն պատրաստել և իմ միջոցով ներկայացրել են ժողովին իւրաքանչիւրն իրեն յանձնուած կալուածների մասին—1. Մայր Աթոռի գիւղատնտես Կ. Մելիք-Շահնազարեան 2. Մարցի կառավարիչ Ս. Սահակեանը 3. Չարեքայ վանքի կառավարիչ Լևոն Տ. Աւետիքեանը և ժողովի հրաւիրուած հանքագէտ Գրիգոր Աղաբաբեանը, որոնք կցուած են գործին Մարցի կալուածքի մասին նախօրօք կազմուած մի ընդարձակ գեկուցման հետ միասին: Սոյն յայտարարութեանս հետ ներկայացնում եմ Ս. Ատենիդ Տնտեսական և Վարչական մասնաժողովների կազմած երկու կարևոր ծրագիրները յիշեալ գեկուցումների և ընդհանուր ժողովների վեց արձանագրութիւնների հետ միասին:

Վերջին ընդհանուր ժողովն եղաւ անցեալ Հոկտեմբերի 28-ին, 29-ին լսելով Վեհափառ կաթողիկոսի մահուան լուրը՝ նոյն օրն էլ ճանապարհուեցի Ս. Էջմիածին՝ արդէն վերջացրած լինելով իմ գործերը: Մինչև այժմ չկարողացի աւելի շուտ գեկուցանել Ատենիդ ժողովների արդիւնքը, որովհետև սպասում էի ստանալ Ղարաբաղի կալուածների կառավարիչ պ. Տրդատ Մատինեանից իւր կառավարութեան ներքոյ գտնուած կալուածների և հանքերի մասին ընդարձակ գեկուցումն, որովհետև ժողովներին նա չէր ներկայացրել գրաւոր:

այլ միայն բերանացի համառօտ տեղեկութիւններ էր տուել, խոստանալով յետոյ ներկայացնել, որպէսզի այդ զեկուցումն ևս կցելով գործին միասին ներկայացնեմ Ատենիդ, բայց մինչև այժմ չստացայ, չնայած որ տեղւոյն Ս. Առաջնորդի միջոցով առանձին նամակովս խնդրել եմ յիշեալ կառավարչից շտապել ուղարկել իւր զեկուցումն, ուստի խնդրում եմ Ատենիդ՝ կարգադրել ստանալ և այդ կարևոր զեկուցումն Ղաբարազի կալուածների մասին:

Ս. Ատենիդ կողմից ինձ վրայ տրուած քաղցր պարտականութիւնը կատարելով՝ խնդրում եմ Սինօզիդ բարեհաճ կարգադրութիւնը ի կատար ածելու յիշեալ կարևոր ծրագիրները, որպէսզի թղթի վրայ մեռած տառ չմնան շատ այլ ծրագիրների նման: Պարաք եմ համարում յայտնել Սինօզիդ, որ երբ վերոյիշեալ պարոններին ժողովի էի հրաւիրում կազմելու մեր կալուածների շահագործման համար մի նպատակայարմար ծրագիր—չատերն արտայայտում էին իրենց թերահաւատ վերաբերմունքը, որ յոյս չունեն իրենց կազմած ծրագիրն էջմիածնի կողմից իրագործուած ականել, որովհետև, ինչպէս ասում էին, շատ անգամ են այս ու այն ծրագիրը կազմել էջմիածնի համար, բայց բոլորն էլ մնացել են առանց ուշադրութեան: Ուրեմն որպէսզի ի չարը չգործադրենք նրանց հաւատն այս անգամ ևս, և ապարդիւն չանցնեն կրած նեղութիւնները, անհրաժեշտ է ի կատար ածել այդ ծրագիրները, որոնց իրագործումից է կախուած Մ. Աթոռի և՛ անտեսական և՛ բարոյական բարելաւումն:

Յայտնի է՝ որ հետզհետէ վերանում են և համարեա չքացել են բոլոր այն պատմական իրաւունք ստացած տուրքերը, որ այս կամ այն ճանապարհով էջմիածինը ստանում էր ժողովրդից, այժմ էջմիածնի անտեսական վիճակը անցողական չըջանի մէջ է գտնուում, որ մի կողմից վերանում են յիշեալ տուրքերը, միւս կողմից էջմիածնի դրամական նեղ վիճակը ստիպում է մեզ լուրջ ուշադրութիւն դարձնել մեր բազմաթիւ արժէքաւոր կալուածների շահագործման վրայ, և մենք անպայման կազատուենք ներկայ դրամական ճգնաժամից՝ եթէ յիրաւի լուրջ ուշադրութիւն դարձնենք և կանոնաւոր շահագործենք մեր բոլոր կալուածքները:

Անգամ Սինօզի ԲԱԲԳԷՆ ՎԱՐԴԱՊԵՏ

10 Յունվարի 1908 թիւ

Ս. էջմիածին.

ԺՈՂՈՎԻ ԱՐՁԱՆԱԳՐՈՒԹԻՒՆՆԵՐԸ.

ՆԻՍՏ Ա.

1907 թիւ հոկտեմբերի 6-ին, երեկոյեան ժամը 7-ին, Թիֆլիսի վանքի եկեղեցական հիւրատան զահլիճում կայացաւ վանքապատկան և եկեղեցական կալուածների կանոնաւոր կերպով շահագործելու մասին խորհրդակցելու համար ս. Սինոդի կողմից հրաւիրուած մասնադէտների, Թեմական Դպրանոցների հոգաբարձական մարմինների ներկայացուցիչների և վանական կալուածների կառավարիչների ժողովի առաջին նիստը:

Ներկայ էին Թեմական Դպրանոցների հոգաբարձութիւնների կողմից՝ Տ. Մուշէ վարդապետ (Նոր-Նախիջևանի), պ. պ. Կանգուրալեան Պօղոս (Երևանի), Աթաբէգեան Ասլան (Շուշու) Առաքելեան Արամ (Բագուի դպրոցների հոգաբարձական մարմնի կողմից). մասնադէտներ՝ պ. պ. գիւղատնտեսներ Քալանթար Ալէքսանդր, Չաւարեան Սիմէօն. Սահակեան Աւետիք, հանքարան՝ Աղաբաբեան Գրիգոր. Իրաւադէտներ՝ պ. պ. Ղամբարեան Պօղոս, Քալանթարեան Նիկողայոս, Սպենդիարեան Յովհաննէս, վանքական կալուածների կառավարիչներ, պ. պ. Սահակեան Սարգիս (Մարցի), Տէր-Աւետիքեան Լևոն (Չարեքայ) և Մատինեան Տրդատ (Ղարաբաղի):

Ժողովը բաց արաւ Տ. Բաբգէն վարդապետը բացատրելով ս. էջմիածնի և հայ ժողովրդի փոխադարձ յարաբե-



բութիւններն ու պարտաւորութիւնները: Նա մասնացոյց ա-  
նելով ս. Էջմիածնի նիւթական կարիքների վրայ, յոյս յայա-  
նեց, որ սոյն ժողովն ուղիղ ձանապարհ և միջոց ցոյց կըտայ  
կարգաւորելու մեր վանքապատկան կալուածները, որոնց ար-  
գիւնքով պիտի կառավարուին ոչ միայն Ս. Էջմիածինն ու  
ձեմարանն, այլ և ամեն տեսակ ազգային ուսումնարանական  
և Աստուածահաճոյ հաստատութիւններ:

Ապա նա իւր գործն աւարտած համարելով յայտարարեց  
ժողովը բացուած և յայանեց, որ թէպէտ ինքը ս. Սինոզի  
կողմից նշանակուած է նախագահ սոյն ժողովին, բայց և այն-  
պէս բարւոք է համարու՞մ, որ ժողովն ինքն ընտրէ իրեն  
համար նախագահ և քարտուղար: Այս առաջարկութեան առ-  
թիւ եզան դիտողութիւններ, թէ քանի որ ժողովականներն  
իրենց ազատ կամքով են հաւաքուած ժողովի, ուստի պէտքէ  
իրեն ժողովին էլ թողնուած լինէր իրեն համար նախագահ  
ընտրելու իրաւունքը, որ անբնաբարելի է. և ոչ թէ ս. Սի-  
նոզը իւր կողմից նշանակած լինէր նախագահ: Ի վերջոյ ժո-  
ղովն որոշեց իւր նիստերը շարունակել Տ. Բարգէն վարդա-  
պետի նախագահութեամբ: Իսկ ժողովի քարտուղար ընտրուեց  
միաձայն Տ. Մուշէ վարդապետը:

Այնուհետև տեղի ունեցաւ մտքերի կրկարատև փոխա-  
նակութիւն ժողովի պարապմունքի, ծրագրի և իրաւանց սահ-  
մանի մասին: Ժողովականներից ոմանք հազորդելով վաստեր,  
թէ ինչպէս անցնալու՞մ ևս Հոգևոր Իշխանութեան առաջար-  
կութեամբ սոյնանման ժողովների ձեռքով կազմուած են և-  
զել զանազան ծրագրներ, թէ ուսումնարանական և թէ տըն-  
տեսական կալուածական խնդիրների մասին, բայց մինչև օրս  
էլ դրանք մնացել են առանց գործադրութեան, կրկիւղ էին  
կրում, թէ մի գուցէ այդ ժողովի պարապմունքներն էլ մնան  
առանց հետևանքի: Սակայն ժողովն ի նկատի առնելով այն  
հանգամանքը, որ մինչև օրս ոչ միայն չկայ մի ընդարձակ  
մշակուած ծրագիր մեր վանական կալուածների նպատակա-  
յարմար կերպով շահագործելու և կառավարելու եզանակի  
մասին, այլ և նոյն իսկ սկզբնական քայլեր անգամ կատա-  
րուած չեն դրանց ուսումնասիրութեան համար, և հասարա-  
կական կարծիքի կամ գիտակցութեան մէջ էլ հաստատուած  
չէ մի ընդհանուր ծրագիր, որի գործադրութեան վրայ պըն-

դէր ու պահանջէր ժողովուրդը, բարւոք համարեց տալ այդպիսի ընդհանուր ծրագրի ուրուագիծը, որքան որ այդ անելու թոյլ կտան ժողովի ձեռքին գտնուած նիւթերը:

Այնուհետև ի նկատի առնելով այն հանգամանքը, որ ժողովի պարագմունքներն արդիւնաւոր կացուցանելու համար անհրաժեշտ է նախապէս որոշել այն առարկաները, որոնցով զբաղուելու է սա, որոշուեց կազմել օրակարգի նիւթերն ու խնդիրները: Եւ որովհետև այդ անելու համար նախապէս հարկաւոր էր ընդհանուր ծանօթութիւն ձեռք բերել ժողովի տրամադրութեան տակ գտնուած նիւթերի մասին, ուստի և որոշուեց նախ լսել վանական կալուածների կառավարիչների զեկուցումները, ապա անցնել այդ կալուածները կառավարելու եղանակի և կառավարող մարմնի իրաւանց և յարաբերութեանց եղանակի մասին խորհրդակցելու:

Ըստ այդմ իրենց գրաւոր և (լրացուցիչ) բանաւոր զեկուցումները տուին պ. պ. Սահակեան Սարգիս—Մարցի կալուածների մասին, Մատինեան Տրդատ՝ Գանձասարի և Խոթայ կալուածների մասին, Տէր Աւետիքեան Լեոն՝ Չարեքայ կալուածների մասին, Տ. Մուշէ վարդապետ և պ. Յ. Սպենդիարեան բանաւոր զեկուցին Նախիջևանի և Բեսարաբիայի թեմում եղած կալուածների մասին, Տ. Բարդէն վարդապետ կարդաց Ս. Էջմիածնի կալուածների և Բջնու անտառի մասին մասնագէտների կազմած զեկուցումները: Ս. Էջմիածնի կալուածների զեկուցումը կազմել էր գիւղատնտես Կ. Մելիք Շահնազարեանը: Այնուհետև մի քանի պարոններ, գլխաւորապէս պ. պ. Չաւարեան Սիմէօն և Քալանթար Ալեքսանդր բանաւոր տեղեկութիւններ հաղորդեցին վանական և եկեղեցական ուրիշ, համեմատաբար մանր կալուածների մասին, ինչպէս են Դալարու, Ս. Խաչի, Ախալցխայի ս. Փրկիչ եկեղեցու և այլն:

Ի վերջոյ ժողովը հանկուժիւն յայտնեց իւր նիստերին հրաւիրուած տեսնել նաև Ս. Էջմիածնի վանքի փաստաբանին, զի դատնտեսին և մի քանի ուրիշ մասնագէտ գիւղատնտեսներ և իրաւագէտ անձեր, ինչպէս են պ. պ. Դոլուխանեան Մարկոս, Տիգրանեան Սիրական, Արծրունի Սենեքերիմ, Ամիրխանեան Յովսէփ, Խաչատրեան Սմբատ, Գեօղայեան Տիգրան, Մելիք—Բախտամեան Յակոբ, Յովհաննիսեան Տիգ-

քան և կուսիկեան Արշակ ժողովը փակուեց երևելոյեան ժամը 10<sup>1</sup>/<sub>2</sub>-ին:

Նախագահ ընդհանուր ժողովի՝

Անդամ Սինոզի Բարզէն վարդապետ

Անդամք՝ Պ. Կանդուրալեան Յովհ. Սպենդիարեան

Ա. Սահակեան Պօղոս Ղամբարեան

Ս. Չաւարեան Ս. Սահակեան

Գ. Աղաբաբեան Ա. Քալանթար

Քարտուղար՝ Մուշէ վարդապետ.

## ՆԻՍՏ Բ.

1907 թիւ Հոկտեմբերի 7-ին, ցերեկուայ ժամը 11<sup>1</sup>/<sub>2</sub>-ին կայացաւ եկեղեցական կալուածների բարուք կառավարութեան և շահագործութեան եղանակները մասին խորհրդակցելու համար կազմուած ժողովի նիստը Տ. Բարզէն վարդապետի նախագահութեամբ: Ներկայ էին պ. պ. Աթաբէգեան Ասլան, Աղաբաբեան Գրիգոր, Առաքելեան Արամ, Չաւարեան Սիմէօն, Թաղէսեան Արշակ, Կանդուրալեան Պօղոս, Ղամբարեան Պօղոս, Մատինեան Տրդատ, Սպենդիարեան Յովհաննէս, Սահակեան Աւետիք, Սահակեան Սարգիս, Տէր-Աւետիքեան Լևոն, Տիգրանեան Նազարէթ և Քալանթար Ալէքսանդր, քարտուղար Տ. Մուշէ վարդապետ:

Ժողովը նախ զբաղուեցաւ վանական կայքերի մասին իւր ձեռին գտնուած և որպէս նախորդ նիստում ղեկուցուած նիւթերի գնահատութեամբ և եկաւ այն եզրակացութեան, որ թէպէտ զբանք մեր ազգային—եկեղեցական կալուածների, նրանց արդի կացութեան և շահագործման եղանակի մասին փոքր ի շատէ ընդհանուր տեղեկութիւն տալիս են, բայց բոլորովին անբաւարար են կազմելու համար այն մանրամասն ծրագիրը, որը կարելի լինէր տալ գործադրութեան: Դրա համար անհրաժեշտ է ձեռքի տակ ունենալ մանրամասն և ճշգրիտ ղեկուցումներ, մասնագէտների ձեռքով կատարուած ուսումնասիրութիւններ և հետազոտութիւններ, կազմել տնտեսական ուրուագծեր (ПЛАНЪ ХОЗЯЙСТВА) և այլն: Սակայն որքան

էլ որ սոյն ժողովը նիւթերի պահասութեան պատճառով անկարող լինի մանրամասն ծրագիր կազմել ու գործին ձեռնարկել, բայց և այնպէս նա այդ կարող է անել ընդհանուր գծերով.— անել ընդհանուր ցուցումներ և գիտողութիւններ, իսկ որտեղ որ հնարաւոր է, կարող է մասնել նաև մանրամասնութիւններ մէջ:

Բայց որովհետև մինչև այժմ կատարուած փորձերն ու կալուածների արդի կացութիւնը ոչ մի գրաւական չեն տալիս՝ թէ մեր հոգևորականութիւնը, ձեռնհաս և մասնագէտ անձերի պակասութեան բացակայութեան պատճառով, պիտի կարող լինի ապագայում ի կատար ածել այն ծրագիրը, որ պիտի մշակէ սոյն ժողովը, իսկ վանական կալուածների կառավարութեան և շահագործութեան անկօնորոշ եղանակը միմիայն քայքայել և տնտեսական ներկայ ճգնաժամին է հասցրել գործը, ժողովը գտնոււմ է, որ անհրաժեշտ է նախ և առաջ կանոնաւորել վանական կալուածների կառավարութեան գործը՝ զլիւսուոր զեկը տալով ժողովրդի ձեռքը: Ժողովն, առանց մանրամասնութեանց մէջ մտնելու, կարծում է, որ մանր կալուածների կառավարութիւնը պիտի յանձնուի ժողովրդի ընտրութեամբ կազմուած տեղական յատուկ հոգաբարձութիւնների, իսկ խոշոր կալուածների կառավարութիւնը — թեմական Հոգաբարձութիւններին: Բոլոր Հոգաբարձութիւնների մէջ որոշ կապ և միութիւն հաստատելու համար էջմիւսածնում պիտի հաստատուի մի Կեդրոնական Մարմին:

Ժողովը վերև արժարժուած ինդիքների շուրջն երկարատև և բազմակողմանի կերպով մտքերի փոխանակութիւն ունենալուց յետոյ որոշեց կազմել երկու մասնաժողով. Իրաւական Վարչական և Տնտեսական: Իրաւական—Վարչական մասնաժողովին յանձնարարուեց մշակել վանական կալուածների բարւոք կառավարութեան եղանակը ժողովրդի մասնակցութեամբ և որոշել այդ կալուածները կառավարելու համար կազմուելիք մարմինների իրաւասութեան և յարաբերութեանց խնդիրները: Այդ մասնաժողովի մէջ մտան Տ. Բարդէն վարդապետ, պ. պ. Սպենդիարեան Յովնանէս, Տիգրանեան Սիրական, Ամիրխանեան Յովսէփ, Յովնանիսեան Տիգրան, Արծրունի Սենեքերիմ, Յարութիւնեան Սամսոն, Խաչատրեան Սմբատ, Դւլուխանեան Մարկոս, Կուսիկեան Արշակ, Քալան-

Թարեան Նիկողայոս, Տիգրանեան Նազարէթ, Ղամբարեան Պօղոս և Աահակեան Աւետիք: Իսկ Տնտեսական մասնաժողովին յանձնարարուեց կազմել մի ծրագիր, որով պիտի առաջնորդուել կալուածների շահագործմանը ձեռնարկելու համար, որքան որ այդ հնարաւոր կըլինի անել ի նկատի ունենալով ժողովին հաղորդուած գրաւոր և բանաւոր տեղեկութիւնները: Այս մասնաժողովի մէջ մասն ալ. պ. Քալանթար Ալէքսանդր, Չաւարեան Սիմէօն, Թաղէոսեան Արշակ, Մաթիսեան Տրդատ, Աահակեան Մարգիս, Տէր Աւետիքեան Լեոն, Կանդուբալեան Պօղոս, Աթաբէգեան Ասլան, Աղաբաբեան Գրիգոր, Առաքելեան Արամ, Գեօղալեան Տիգրան, Մելիք-Բախտամեան Յ. և Տ. Մուշէ վարդապետ: Աոյն Մասնաժողովին յանձնուեցան ժողովի ձեռին գտնուած բոլոր գրաւոր ղեկուցումները վանական կալուածների մասին, որոնք յետոյ, մասնաժողովների ղեկուցումների հետ միասին պիտի կցուին ժողովի արձանագրութիւններին: Ժողովը փակուեց ցերեկուայ ժամը 3<sup>1</sup>/<sub>2</sub>-ին: Նախագահ՝

Անդամ Սինոզի Բարգէն վարդապետ

Անդամք՝ Պ. Կանդուբալեան	Պօղոս Ղամբարեան
Ա. Աահակեան	Ա. Աահակեան
Ա. Չաւարեան	Ա. Թաղէոսեան
Գ. Աղաբաբեան	Ն. Տիգրանեան
Յով. Սպինդիարեան	

Քարտուղար Մուշէ վարդապետ.

### ՆԻՍՏ Գ.

1907 թ. Հոկտեմբերի 21-ին ցերեկուայ ժամը 12-ին՝ Տ. Բարգէն վարդապետի նախագահութեամբ կայացաւ վանական կալուածների բարուք կառավարութեան մասին հրաւիրուած խորհրդի երրորդ նիստը: Ներկայ էին պ. պ. Աթաբէգեան Ասլան, Աղաբաբեան Գրիգոր, Ամիրխանեան Յովսէփ, Գեօղալեան Տիգրան, Չաւարեան Սիմէօն, Դօլուխանեան Մարկոս, Լիսիցեան Ստեփան, Խաչատրեան Սմբատ, Կան-

դուրախան Պօղոս, Կուսիկեան Արշակ, Ղամբարեան Պօղոս, Մելիք-Բախտամեան Յակոբ, Յարութիւնեան Սամսօն, Յովհաննիսեան Տիգրան, Սպենդիարեան Յովհաննէս, Սահակեան Աւետիք, Սահակեան Սարգիս, Տիգրանեան Նաղարէթ և Ալէքսանդր Քալանթար: Քարտուղար Տ. Մուշէ վարդապետ:

Կարդացուեցան նախորդ երկու նիստերի արձանագրութիւնները և հաստատուեցան: Ապա հայր նախագահը յայտնելով, որ նախորդ նիստում եղած որոշման համաձայն կազմուած երկու մասնաժողովները—Տնտեսական և Իրաւական—Վարչական—արդէն իրենց աշխատանքներն աւարտած են, առաջարկեց լսել այդ մասին կազմուած ղեկուցումներն ու կարեոր դիտողութիւններ անելուց յետոյ վերջնական խմբագրութիւն տալ զրանց և որպէս սոյն ժողովի ելրակացութիւն ներկայացնել ս. Սինօզին:

Տնտեսական մասնաժողովի նախագահ պ. Քալանթար Ալէքսանդր կարդաց իւր ղեկուցումը Տնտեսական մասնաժողովի գործունէութեան մասին, որից երևում է, որ Մասնաժողովն ունեցել է վեց նիստ և ի մօտոյ ծանօթանալով կալուածների մասին առձեռն եղած նիւթերի հետ, կազմել է այն ծրագիրը և միջոցները, որ հարկաւոր են կալուածների ուշումնասիրութեան գործը կանոնաւոր հիմքերի վրայ դնելու և առաջ տանելու համար. միևնոյն ժամանակ Մասնաժողովն արել է նաև մի քանի մանրամասն ցուցումներ, ինչպէս օրինակ Մարցի անտառների շահագործման վերաբերմամբ: Ժողովը մի քանի մանր դիտողութիւններից յետոյ ընդունեց Տնտեսական մասնաժողովի ղեկուցումն և որոշեց այն կցել սոյն արձանագրութեան:

Ապա Տ. Բարգէն վարդապետը, որպէս նախագահ Իրաւական—Վարչական Մասնաժողովի, կարդաց նոյն մասնաժողովի քարտուղար պ. Ս. Տիգրանեանի կազմած արձանագրութիւնները, որ բաղկացած էին երկու մասից: Առաջին մասի մէջ արծարծուած էր մեր վանական կալուածների կառավարութեան գործը կանոնաւորելու համար ժողովրդից ընտրուած յատուկ մարմիններ կազմակերպելու խնդրին, իսկ երկրորդ մասի մէջ յօդուածական կարգով առաջ են բերուած առաջին մասի մէջ արծարծուած դրութիւնները:

Ժողովը բաւական երկար ժամանակ դիտողութիւններ

անկող իրաւական—Վարչական մասնաժողովի կազմած արձանագրութիւնների մասին, գտաւ, որ թէգիւները խմբագրուած են ոչ բաւարար որոշ և պարզ սահմաններով, ուստի և որոշուեց նախ քան մասնաժողովի կազմած նախագծի քննութեան ըստ էութեան անցնելը, խնդրել մասնաժողովի անդամ պ. Յովհաննէս Սպենդիարեանին յաջորդ ժողովին ներկայացնել պարզ և որոշ ձևակերպած այն սխեման, որ իրաւական—Վարչական մասնաժողովը մշակել է իւր նիստերում մեր վանական և եկեղեցական կայք ու կալուածները կառավարելու ևզանակի մասին:

Նախագահ ընդհանուր ժողովի՝

Անդամ Սինոզի Բարգէն վարդապետ

Անդամք՝ Յովհաննէս Սպենդիարեանց

Սմբատ Խաչատրեան Սարգիս Սահակեան

Տիգրան Գեօղալեան Նազարէթ Տիգրանեան

Սիմէօն Զաւարեան Յովսէփ Ամիրխանեան

Գրիգոր Աղաբաբեան

Քարտուղար՝ Մուշէ վարդապետ.

## ՆԻՍՏ Դ.

1907 թ. Հոկտեմբերի 22-ին, ցերեկուայ ժամը 11-ին կայացաւ վանական կալուածքների բարւոքման մասին խորհրդակցելու համար կազմուած ժողովի չորրորդ նիստը Տ. Բարգէն վարդապետի նախագահութեամբ, քարտուղար Տ. Մուշէ վարդապետ, ներկայ էին Աղաբաբեան Գրիգոր, Ամիրխանեան Յովսէփ, Արծրունի Սենեքերիմ, Զաւարեան Սիմէօն, Խաչատրեան Սմբատ, Կանդուրալեան Պօղոս, Մելիք-Բախտամեան Յակոբ, Յարութիւնեան Սամսօն, Սպենդիարեան Յովհաննէս, Սահակեան Աւետիք, Սահակեան Սարգիս, Քալանթար Ալէքսանդր:

Նախ կարդացուեց նախընթաց ժողովի արձանագրութիւնը և հաստատուեց: Ապա պ. Յ. Սպենդիարեանը ներկայացրեց նախորդ ժողովի որոշմամբ և յանձնարարութեամբ կազմած հետևեալ ուրուագիծը՝ վանական և եկեղեցական

կալուածները կառավարելու սխեմայի մասին.—«Միացեալ  
« ժողովը, լսելով իրաւաբանական սեկցիայի ներկայացրած դե-  
« կուցումը և նկատի առնելով ժողովի մի քանի անդամներին  
« յայտնած դիտողութիւնները, գտաւ, ա) որ ղեկուցման մէջ  
« որոշակի չէ շեշտուած ծուխի, իբրև ինքնուրոյն մարմին  
« մասնակցութիւնն եկեղեցապատկան կալուածների կառավա-  
« րութեան մէջ, ինչպէս չէ որոշուած ծուխի և թեմական  
« ժողովի փոխադարձ յարաբերութիւնները և նրանց իրաւա-  
« սութեան սահմանները. բ) վանքապատկան և եկեղեցապատ-  
« կան կալուածների կառավարութեան սխեմը յայտնապէս չէ  
« ընդգծուած, և գ) վանքապատկան կալուածների հետ պէտք  
« է յիշել և եկեղեցապատկան կալուածների մասին, ուստի  
« հիմնուելով իրաւաբանական սեկցիայի ընդունած սկզբունք-  
« ների վրայ, միացեալ ժողովը որոշում է, համառօտ և ընդ-  
« հանուր գծերով, հայոց եկեղեցու պատկանեալ համայն  
« ստացուածքի հետեւեալ սխեմը.— Ա. իւրաքանչիւր թեմի  
« շրջանում գտնուած վանքապատկան կալուածներին տէրն ու  
« տնօրէնը հանդիսանում է թեմական պատգամաւորական  
« ժողովը: Նրա իրաւասութեան ենթակայ են տեղական մաս-  
« նաժողովները կամ գործակալութիւնները, որոնց անմիջա-  
« կան կառավարութեան և շահագործմանը յանձնուում են  
« յիշեալ կալուածները, համաձայն թեմական ժողովում ըն-  
« դունուած ծրագրերի և հրահանգների, այդ մասնաժողովների  
« թիւը իւրաքանչիւր թեմում, որպէս և գործունէութեան  
« շրջանը, որոշում է թեմական պատգամաւորական ժողովը:  
« Տեղական մասնաժողովների գործունէութեան վրայ հսկում է  
« թեմական խորհուրդը, որն ընտրւում է թեմական ժողովից  
« որոշ ժամանակով և նրա մշտական կատարողական օրգանն է:  
« Բ. եկեղեցապատկան գոյքի տէր և տնօրէնն եկեղեցական  
« ծուխն է. նա իւր իրաւասութեան սահմանում գործում է  
« իբրև ուրոյն ինքնավարական մարմին. (տես օր. 1229 և  
« 1232 յօդ. XI հ. I մ.): եկեղեցական ստացուածքի անմի-  
« ջական կառավարութիւնը յանձնուում է ծխական խորհրդին,  
« որն ընտրւում է և իւր գործունէութեան մէջ հրահանգւում  
« է ծուխից: Տարին մի անգամ ծուխը ներկայացնում է իւր  
« գործունէութեան տեղեկագիրը ի վիստութիւն և ի հայեցո-  
« ղութիւն թեմական ժողովին, որին պատկանում է միջա-



« մտութեան իրաւունքը նկատուած ապօրինութեան և ղեղ-  
« ծուկների դէպքում: Բարձրագոյն Ինստանցիան վարչական  
« սխեմի մէջ հանդիսանում է կենդրոնական ժողովը, որի  
« անդամներն ընտրուում են իւրաքանչիւր թեմի պատգամա-  
« ւորական ժողովից որոշ թուով: Կենդրոնական ժողովը  
« ընտրուում է չորս տարին մի անգամ և գումարուում է էջ-  
« միածնում: Նա ունի այն իրաւունքները, որոնք յիշատակուած  
« են իրաւաբանական սեկցիայի ղեկուցման մէջ:»

Սոյն ուրուագիծը ժողովում երկարատև և մանրամասն  
քննութեան ու վիճարանութիւնների նիւթ կղաւ.— ոմանք  
առաջարկում էին պահպանելով ծուխի աւտօնօմ գոյութիւնը,  
կազմել նաև մի քանի ծխերի միութիւններ կամ գործակա-  
լութիւններ, իրենց չրջանի վերաբերեալ կուլտուրական և այլ  
հանրային ընդհանուր բնաւորութիւն ունեցող հաստատու-  
թիւնների մասին հոգալու համար, այդ դէպքում, մի քանիսի  
կարծիքով, գործակալութիւններն են կառավարում նաև իրենց  
չրջանի վանքապատկան կալուածները և ենթարկում են  
թեմական ժողովին, որը տէր և տնօրէն է հանդիսանում  
թեմի վանքապատկան կալուածների: Բարձրագոյն Ինստան-  
ցիան կազմում է կենդրոնական ժողովը: Այս չորս աստիճանի  
ժողովները ունին իրենց գործադիր մարմինները.— խորհուրդ-  
ները: Ոմանք առաջարկում էին եկեղեցական կայքերի կա-  
ռավարութիւնը պահել ծխի և ծխերի միութեան կամ գոր-  
ծակալութեան ձեռին, իսկ վանական կառավարութիւնը  
յանձնուի թեմական ժողովին, որը միանգամայն տէր և տնօ-  
րէն է հանդիսանում այդ կայքերի և միայն հսկողութիւն  
ունի ծխերի վրայ: Պ. Զաւարեան Սիմէօն առաջարկում է մի  
այսպիսի սխեմա.— «Գոյութիւն ունեցող ծխերում, գործակա-  
լութիւններում, թեմերում և կենդրոնում հաստատում են  
« ծխական, չրջանային, թեմական և կենդրոնական անտեսա-  
« կան խորհուրդներ (ընտրողական սկզբունքի վրայ), համա-  
« պատասխան գործադիր մարմիններով: Խորհուրդները հոգ  
« են տանում իրենց իրաւասութեան տակ գտնուած ազգային—  
« եկեղեցական գոյքերի պահպանութեան և շահագործութեան  
« համար. հանդիսանում են վերահսկիչներ իրենց չրջանում  
« գտնուած աւելի մանր մարմինների նկատմամբ և համա-

«չափ կերպով բաշխում են ընդհանուր գոյքերից ստացուած  
« եկամուտները:»

Եղան դիտողութիւններ, թէ վանական-եկեղեցական  
կայքերի կառավարութեան համար կազմուելիք մարմինների  
աստիճանական թիւը, չորս հատ—ծուխ, գործակալութիւն,  
թեմ և կենտրոն—չատ է, որով և պիտի ծանրանայ ու  
դժուարանայ կառավարութեան գործը, ուստի և առաջարկուեց  
եկեղեցական կայքերի կառավարութեան վերաբերմամբ  
ծուխը ճանաչել իբրև աւտօնօմ մարմին, որ կ'ենթարկուի  
Թեմական Ժողովի հսկողութեան, իսկ վանական կալուած-  
ները կառավարուեն թեմական և կենտրոնական Ժողովնե-  
րով իրենց խորհուրդների ձևով: Թեմական Ժողովները  
հարկաւորութեան դէպքում կարող են կազմել նաև Գործա-  
կալական մարմիններ, գործակալութեան շրջանում գտնուած  
վանքապատկան կայքերը կառավարելու համար: Նոյն նպա-  
տակով առաջարկուեց նաև՝ բաւականանալ միմիայն մէկ  
կենտրոնական Ժողովով կամ խորհրդով՝ ընտրուած թեմական  
պատգամաւորների միջոցով:

Ժողովում մտքերի բաւական երկար փոխանակութիւն  
եղաւ նաև կալուածներից ստացուած եկամուտների գործա-  
դրութեան և բաշխման նկատմամբ: Ոմանք կարծում էին, որ  
ոչ ծուխը և ոչ էլ թեմը իրաւունք չպիտի ունենան իրենց  
ստացած աննայն տեսակ եկամուտները գործ դնել լոկ իրենց  
տեղական պէտքերի վրայ, այդ իրաւունքը պատկանելու է  
միմիայն կենտրոնին, որը ինկատի առնելով թեմերի կարիքնե-  
րը, ըստ այդմ էլ կըկատարէ ընդհանուր եկամուտների բաշ-  
խումը թեմերի վրայ, այդ դէպքում, ոմանց կարծիքով, պէտք է  
ի նկատի առնուի իւրաքանչիւր թեմի հայ Ժողովրդի թիւը  
և այդ թուի համեմատ էլ կատարուի բաշխումը:—Ոմանք կար-  
ծում էին, թէ եկեղեցական կայքերի ու դրամադրուխների  
կառավարութեան և ստացուած եկամտի գործադրութիւնը  
պէտք է լինի ծուխի իրաւունքը, իսկ վանական կալուածների  
արդիւնքի բաշխման իրաւունքը պիտի պատկանի կենտրո-  
նին:—Սակայն ոմանց կարծիքով էլ ինչպէս ծուխն եկեղեցա-  
կան եկամուտների վերաբերմամբ, այնպէս էլ թեմը վանա-  
կան կալուածներից ստացուած մուտքերի վերաբերմամբ բո-  
լորովին ազատ պիտի լինին այդ մուտքերը լիովին գործ դնե-

լու իրենց տեղական կարիքները լրացնելու համար—Իսկ ոմանք ևս անհրաժեշտ էին համարում չբռնանալ թեմերի վրայ, բայց պարտաւորացնել, որ իւրաքանչիւր թեմ իւր եկամուտները մի յայտնի 0/8-ը պարտական լինի յատկացնել կենտրոնական ֆոնդին, որի միջոցներով պիտի պահպանուին ընդհանուր բնաւորութիւն ունեցող հանրային հաստատութիւնները և հոգացուին հասարակական կարիքները:

Ոչ նուազ ուշադրութեան առարկայ դարձաւ նաև «Տէր և Տնօրէն» բառերի գործադրութիւնը: Ոմանց կարծիքով այդ բառերը բովանդակելով իրենց մէջ «սեփականութեան իրաւունքի, տիրապետութեան» գաղափարը, կարող չեն յատկացնուիլ այնպիսի մարմինների, որոնք սեփականութեան իրաւունք չունին՝ մանաւանդ քանի որ դեռ գոյութիւն ունի Պօլսօփեհիան, որը հիմք է ծառայում ժողովին կազմելիք սխեմայի: Պօլսօփեհիայով սեփականութեան իրաւունքը պատկանում է հայ եկեղեցուն, որը ի դէմս ս. Էջմիածնի ներկայանում է իրաւական մարմին, իսկ ազգը, ժողովուրդը մի այդպիսի մարմին չէ կազմում: Տէր և տնօրէն կարող է լինել միմիայն հայ եկեղեցին իւր լրութեամբ: Իսկ այդ իրաւունքին ձեռնաձուլի լինելը համարելի է չափազանց վտանգաւոր, վնասակար և նոյն իսկ կեանքի ներկայ պայմաններում աննպատակալարմար և անկարելի: Իսկ ոմանք էլ կարծում էին, թէ քանի որ եկեղեցական և վանական կալուածները պատկանում են համայն հայ ժողովրդին, իսկ Էջմիածինը կամ հայ եկեղեցին իսկապէս անուանական տէր է հանդիսանում այդ կալուածներին, պէտք է որ սոյն ժողովի նպատակը լինի այդ կալուածների de facto տէր դարձնել հայ ժողովուրդը, և այդ իսկ նպատակով անհրաժեշտ է տէր և տնօրէն ճանաչել եկեղեցական կալքերի համար ծուխը, իսկ վանքականի համար թեմը:

Ժողովն ի նկատի առնելով, որ խնդիրն արդէն բաւականաչափ լուսաբանուած է, յանձնարարեց իրաւարաններ պ. պ. Յ. Սպենդիարեանին, Ս. Յարութիւնեանցին և Ս. Խաչատրեանցին առաջիկայ ժողովին ներկայացնել վանական և եկեղեցական կալուածների կառավարչութեան պարզ և որոշ կազմած սխեման, հիմնուելով Իրաւական—Վարչական մասնաժողովի արձանագրութեան պ. Յ. Սպենդիարեանի ներ-

կայացրած ուրուագծի և վերջին երկու ժողովներում արծարծուած մտքերի ու գիտողութիւնների վրայ:

Ապա ժողովն զբաղուեցաւ պ. Ս. Չաւարեանցի հետեւեալ առաջարկութեամբ: «Ա.) Հարկ անհրաժեշտ է. որ ս. Սինոզն այժմէն իսկ կարգադրէ, որպէս զի կանախտորիաները, վանահայրերը և ս. Սինոզին ենթարկուած ամեն տեսակ հաստատութիւններ և անհատներ այսուհետեւ վանական կալուածների վերաբերեալ ոչ մի ձեռնարկ, ոչ մի կապալ, ոչ մի պայմանագիր իրաւունք չունենան կազմելու առանց գործում չհաստատուած մասնագէտների և իրաւագէտների խորհրդակցութեան, համաձայնութեան և պատասխանատուութեան. Բ.) Ազգային-եկեղեցական ընդհանուր գոյքերից, ինչպէս և այլ աղբիւրներից ստացուած եկամուտները գործադրուելու են կրթական, կրօնական՝ բարեգործական և այլ ազգային ընդհանուր պէտքերի վրայ: Բաշխումը նպատակաշարժար կերպով կատարելու համար վանական կալուածների եկամուտներին պէտք է աւելացնել նաև այն յատուկ եկամուտները, որ ունին ազգային այլ և այլ հաստատութիւնները (գալոցները, եկեղեցիները և այլն): Այդ ընդհանուր եկամտից պէտք է ապահովել ա. Վեհարանի, Ճեմարանի և Էջմիածնի միաբանութեան պէտքերը իբրև ազգային-եկեղեցական կենտրոնական հիմնարկութիւնների. բ. մնացած գումարը պէտք է բաժանել թեմերի, շրջանների, ծխերի մէջ ըստ ազգաբնակչութեան թուի և համեմատական կարիքի. գ) Թիւրքիայի և այլ երկրներում ապրող հայերի բաժինը որոշելու համար հաւաքել տեղեկութիւններ այդ վայրերում գրանուած ազգային-եկեղեցական գոյքերի և եկամուտների մասին:»

Ասոյն առաջարկութիւնը քննութեան ենթարկելուց յետոյ ժողովը որոշեց իբրև սկզբունք ճանաչել և այժմէն իսկ գործադրելի համարել այդ առաջարկութեան առաջին մասը, որով վանական կալուածներին վերաբերեալ ոչ մի ձեռնարկ պայման, կապալ և այլն չպիտի կատարուի առանց մասնագէտ անձերի խորհրդակցութեան, հաւանութեան և պատասխանատուութեան: Իսկ առաջարկութեան մնացեալ երկու կէտերը իբրև նիւթ յանձնարարել նոր ընտիր եռանձնեայ իրաւագէտների մասնագիտովի ուղղութեան:

Ի վերջոյ ժողովը ի նկատի առնելով ժողովին յանձնա-

բարուած ձեռնարկութեան առաջնակարգ կարեորութիւնը, այլ և երկիւղ կրելով, թէ մի գուցէ այս պարագմունքի արդիւնքներն էլ մնան ըստ առաջնոյն առանց որ և է հետեանքի, որոշեց կազմել չորս հոգուց բաղկացած մի պատգամաւորութիւն՝ յանձնարարելով նրան գնալ Ա. Էջմիածին և տալ ուժ անկ է մանրամասն բացատրութիւններ ժողովի կազմած երկու—անտեսական և իրաւական—վարչական—սխեմների մասին: Պատգամաւորութեան անդամ ընտրուեցան պ. պ. Ղամբարեան Պօղոս, Յարութիւնեան Սամսօն, Զաւարեան Սիմէօն և Սահակեան Աւետիք: Ժողովը փակուեց ցերեկուայ ժամը 3-ին:

Նախագահ ընդհանուր ժողովի  
Անդամ Սինօղի Բարզէն վարդապետ

- |                       |              |
|-----------------------|--------------|
| Անդամը՝ Յ. Ամիրխանեան | Ա. Սահակեան  |
| Ս. Արծրունի           | Ս. Խաչատրեան |
| Ա. Թադէոսեան          | Գ. Աղաբաբեան |
| Ս. Սահակեան           | Ս. Զաւարեան  |
| Յ. Սպենդիարեան        |              |

Քարտուղար Մուշէ վարդապետ.

### ՆԻՍՏ Ե.

1907 թիւ Հօկտեմբեր 25-ին կայացաւ վանական կալուածների բարեօրքման մասին խորհրդակցելու համար կազմուած ժողովի հինգերորդ նիստը՝ նախագահութեամբ Տ. Բարզէն վարդապետի ներկայ էին Տ. Մուշէ վարդապետ, Գ. Աղաբաբեան, Յ. Ամիրխանեան, Ս. Զաւարեան, Ն. Տիգրանեան, Ա. Սահակեան, Ս. Սահակեան, Յ. Սպենդիարեան և Ա. Թադէոսեան: Կարգացուեց նախկին ժողովի արձանագրութիւնը ժողովը ի նկատի առնելով որ ժողովականներից չատերը բացակայ են՝ որոշեց լսել պ. Յ. Սպենդիարեանի զեկուցումը և ներկայացնել հետեւեալ ընդհանուր ժողովի հաստատութեան:

Պ. Յովհաննէս Սպենդիարեանը կարգաց իւր զեկուցումը:  
Պ. Սմէթօն Զաւարեանը յայտնեց այն կարծիքը, որ անհրա-

ժեշտ է սահմանել որոշ ազգային տուրք մեր բոլոր կուլտուրական հաստատութիւնների համար: Այդ տուրքը պէտք է սահմանի կենտրոնական ժողովը և պարտադիր դարձնի բոլորի համար: Այդ առաջարկութեան առարկեցին ժողովականներից շատերը, որ ի նկատի առնելով գոյութիւն ունեցող օրէնքները, կարծում են, թէ այդպիսի տուրք հաստատելը դժուար և անիրագործելի կըլինի, բայց ընդհակառակը նպատակայարմար համարուեց ծխական տուրք մտցնել, որ թոյլ է տրուած ներկայ Տ. Փոխարքայի ժամանակաւոր կանոններով:

Տ. Մուշէ վարդապետը նկատում է, որ սխեմայի մէջ հայ հոգևորականութիւնը բոլորովին դուրս է ձգուած: Նա ներկայացնում է մի իրաւազուրկ մարմին, այդ հանդամանքը կարող է բազմաթիւ թիւրիմացութիւնների և ընդհարումների պատճառ դառնալ, ուստի առաջարկում է այդ անհարթութիւնը մեղմելու համար որոշել, որ Թեմական Առաջնորդը ոչ միայն նախագահ է Թեմական ժողովի, այլ և Թեմական խորհրդի: Բացի այդ կետրոնական ժողովը կազմուած պիտի լինի Թեմերի ներկայացուցիչներից, որոնցից իւրաքանչիւրը հնարաւորութիւն պիտի ունենայ կենտրոնական ժողովում պաշտպանել իւր Թեմի կարիքները և, որ գլխաւորն է, բիւտջէն: Ս. Էջմիածնի բիւտջէն պէտք է քննուի կենտրոնական ժողովում, բայց Էջմիածինը հնարաւորութիւն չպիտի ունենայ պաշտպանելու իւր կարիքները, իւր բիւտջէն: Անհրաժեշտ է, որ Էջմիածինն իւր յատուկ ներկայացուցիչն ունենայ կենդրոնական ժողովի նախագահութեան խնդիրը՝ հետեզական լինելու համար պէտք է որ այդ նախագահն Ս. Էջմիածնի միաբանութիւնից լինի՝ որին կընշանակէ վեհափառ կաթողիկոսը:

Ժողովը որոշեց ընդունել՝ ա.) Թեմական ժողովի և խորհրդի նախագահն է Թեմական Առաջնորդը: բ.) կենդրոնական ժողովին անդամակցում է Ս. Էջմիածնի միաբանութիւնից ընտրուած մի անձը, գ.) կենդրոնական ժողովի նախագահ համարում է վեհափառ կաթողիկոսը:

Ի վերջոյ հայր Մուշէ վարդապետը ժողովի ուշադրութիւնը հրաւիրեց կովկասից գուրս գտնուած երկու Թեմերի վրայ, որոնց ներքին ազգային կեանքը գտնուում է բոլորովին

ուրոյն պայմաններէ մէջ, քան կովկասում: Այսպէս օրինակ, մինչդեռ կովկասահայերը օգտուում են Տ. Փոխարքայի հրատարակած ժամանակաւոր կանոններով, Աստրախանի և Բևաարքայի թեմերը նոյն իսկ զրկուած են իրենց ծխական—եկեղեցական ղարոյներ ունենալու և կառավարելու իրաւունքից:

Ժամանակն ուշ լինելու պատճառով ժողովը որոշեց յատկապէս զբաղուել այդ ուշագրաւ խնդրով իւր յաջորդ նիստում: Պ. Յովհաննէս Սպենդիարեանի կազմած ծրագիրը մի քանի փոփոխութիւններով ժողովականներն որոշեցին ներկայացնել հասեակ ընդհանուր ժողովի հաստատութեան:

Նախագահ ընդհանուր ժողովի՝

Անդամ Սինօղի՝ Բարզէն վարդապետ

Անդամք՝ Արշակ Թաղէոսեան Սարգիս Սահակեան

Գրիգոր Աղաբաբեան Յովհաննէս Սպենդիարեան  
Աւետիք Սահակեան

Քարտուղար՝ Յովսէփ Ամիրխանեան.

### ՆԻՍՏ Զ.

1907 թ. 28 Հոկտեմբերի կայացաւ վերջին վեցերորդ նիստը նախագահութեամբ Տ. Բարզէն վարդապետի, ներկայ էին պ. պ. Ս. Արծրունի, Յ. Ամիրխանեան, Գ. Աղաբաբեան, Տ. Գեօղալեան, Ա. Թաղէոսեան, Ա. Սահակեան, Ս. Սահակեան, Ս. Սաչատրեան և Յ. Սպենդիարեան:

Կարգացուեցաւ անցեալ ժողովի արձանագրութիւնը, որը մի քանի դիտողութիւններից յետոյ ժողովականների կողմից հաստատուեցաւ: Յօդուածական կարգով կարգացուեցաւ վերջին խմբագրութեամբ Իրաւաբանական—Տնտեսական սեկցիայի կազմած ուրուագիծը, որն՝ ժողովը լսելուց յետոյ հաստատեց:

Նախագահ ընդհանուր ժողովի՝

Անդամ Սինօղի՝ Բարզէն վարդապետ

Անդամք՝ Սմբատ Սաչատրեան Տիգրան Գեօղալեան

Սենեքերիմ Արծրունի Աւետիք Սահակեան

Արշակ Թաղէոսեան Սարգիս Սահակեան

Գրիգոր Աղաբաբեան Յովհն. Սպենդիարեան

Քարտուղար՝ Յովսէփ Ամիրխանեան.

## ՏՆՏԵՍԱԳԻՏԱԿԱՆ ՍԵՆՅԻԱՅԻ

### ԶԵԿՈՒՑՈՒՄԸ:

Տնտեսագիտական սեկցիան սկսեց իր պարապմունքները հոկտեմբերի 8-ին և վերջացրեց 18-ին: Նա ունեցաւ վեց նիստ, հոկտեմբերի 8, 9, 10, 11, 15 և 18-ին:

Սեկցիան իր պարապմունքները կանոնաւոր վարելու համար ընտրեց իր առաջին նիստում պ. Ա. Քալանթարին նախագահ և որոշեց զբաղուել հետևեալ խնդիրներով:

I Կազմել ծրագիր եկեղեցական կալուածների այնպիսի ուսումնասիրութեան, որ նիւթ մատակարարէ կալուածների բարւոքման ուրուագիծները մշակելու համար:

II Օգտուելով եկեղեցական կալուածների մի քանիսի կառավարիչների ներկայութիւնից, ծանօթանալ կալուածների ներկայ դրութեան ու մերձակայ կարիքների հետ և յայտնել խորհրդածութիւններ այն մասնաւոր բարւոքումների մասին, որոնք կարող են գործադրուել մինչև վերջնական տնտեսական ուրուագծերի մշակումը և իրագործումը:

III Քննել կալուածների բարեկարգութեան ուղեկից խնդիրները և պարզել այն միջոցները, որոնք անհրաժեշտ են կալուածների բարեկարգութեան ծրագիրը իրականացնելու համար: Սեկցիան կարևոր համարեց ստուարացնել իր կազմը, հրաւիրելով մասնագէտ և հմուտ անձեր: Սեկցիայի պարապմունքներին մասնակցեցին հետևեալ անձերը, հոգեորականներ՝ Բարգէն և Մուշէ վարդապետները, ազրօնօմներ և անտառագէտներ՝ Ա. Քալանթար, Ս. Չաւարեան, Ա. Թաղէտսեան, Պ. Կանգուրալեան, Տ. Գեօղալեան, Կ. Մելիք-Բախտամեան, հանքագէտ՝ Գ. Աղաբաբեան, ֆինանսիստներ՝ Կ. Ալիխանեան, Պ. Ղամբարեան, հոգաբարձական ներկայացուցիչներ՝ Ա. Աթաբէգեան, Ա. Առաքելեան, ինժինեժներ՝ Գ. Կիրակոսեան Յ. Չախմախասաղեան, Յովսէփեան, կալուածական կառավարիչներ՝ Ս. Սահակեան, Տ. Մատինեան և Լ. Տէր Աւետիքեան:

Սեկցիան զբաղուեց յատկապէս այն խնդիրներով, որոնք ունեն տնտեսագիտական ընաւորութիւն, թողնելով միւս խնդիրների քննութիւնը խորհրդակցութեան ընդհանուր ժողովին: Իրաւագիտական սեկցիայի հետ միասին:



ներկայ զեկույցմանը կցուած են 1, կալուածների ուսումնասիրութեան ծրագիրը, որ մշակել է սեկցիան իւր նիստերում, 2, հանքագէտ Գ. Ազարարեանի գրաւոր կարծիքը «Էջմիածնապատկան հանքերի շահագործութեան մասին» և 3, Ս. Սահակեանի առաջարկութիւնները Մարցի կալուածի շահագործութեան մասին:

I.

Տնտեսագիտական սեկցիան, ծանօթանալով այն բոլոր նիւթերի հետ, որոնք գոյութիւն ունեն եկեղեցական կալուածների վերաբերմամբ, եկաւ այն եզրակացութեան՝ որ առաջինը կալուածների շահագործութիւնը գտնուում է ներկայումս վերին աստիճանի անբաւարար վիճակի մէջ և որ երկրորդ, կան բաւականաչափ հիմունքներ պնդելու թէ կալուածների բարեկարգութեամբ հնարաւոր է զգալի չափով աւելացնել նրանց արգիւնաբերութիւնը և մեծացնել նրանց տարեկան եկամուտը:

Կալուածների բարեկարգութեան նախագիծներ մշակելու կամ «անտեսութեան ուրուագծեր կազմելու համար սակայն անհրաժեշտ են մի շարք տեղեկութիւններ, թուեր, յատակագիծներ, մակարդակներ, փորձնական ցուցումներ: Դրանցից ոչ մէկն էլ չկայ մեր տրամադրութեան տակ, որովհետև Էջմիածինը երբէք լուրջ ու սխտեմական կերպով չէ զբաղուել կալուածական բարեկարգութեան խնդրով և չէ կազմակերպել նրանց մանրամասն ուսումնասիրութեան գործը: Իսկ առանց տնտեսական, տեխնիքական և այլ նիւթերի անկարելի է որ և է էական քայլ անել զէպի առաջ բարեկարգութեան ծրագիրներ մշակելու ժամանակ: Իրերի այդպիսի դրութիւնը ցոյց է տալիս, որ անհրաժեշտ է անմիջապէս ձեռնարկել այն բոլոր նիւթերի հաւաքման և նախապատրաստութեան, որոնց հիման վրայ կարելի է կազմել կալուածների բարեկարգութեան ուրուագիծները:

Նկատ առնելով այդ հանգամանքները սեկցիան զբաղուեց մշակելով կալուածների ուսումնասիրութեան մի ծրագիր, որը պէտք է տայ այն նիւթերը, որոնց բացակայութեան պատճառով անհնարին է ներկայումս առաջ տանել կալուածների բարեկարգութեան գործը:

Ուսումնասիրութիւնը պէտք է կատարուի յասուկ յանձնաժողովների ձեռքով, որոնք պէտք է կազմուած լինեն գիւղատնտես կամ հանքագէտ մասնագէտներից, իրաւագէտներից, կալուածների կառավարիչներից և տեղական ազգաբնակչութեան ներկայացուցիչներից: Մասնագէտների տեսակը և թիւը անշուշտ կախուած կլինեն որոշ կալուածի բնատրութիւնից. այնտեղ, ուր անտառային մեծ անտեսութիւն է, անկասկած մասնագէտը կըլինի անտառագէտը. այնտեղ, ուր վարելահողեր են և այգեսեղեր, հարկաւոր կզան ագրոնոմներ, այնտեղ, ուր հանքային հարստութիւններ կան, կը հրաւիրուեն հանքագէտներ, այնտեղ՝ ուր խճճուած իրաւաբանական յարաբերութիւնների խնդիրներ կան, անհրաժեշտ կը լինեն իրաւագէտներ և այլն:

Յամենայն դէպս՝ յանձնաժողովում աւելի երկարատև և մեծ գործ ու աշխատանք կունենան անտառագէտները և ագրոնոմները, իսկ հանքագէտները և իրաւագէտները կը հրաւիրուեն միայն որոշ ժամանակներում՝ որոշ խնդիրների ուսումնասիրութեան և քննութեան համար:

Տնտեսագիտական սեկցիան հաշուի առնելով այն հանգամանքը, որ մի անգամից դժուար է և թանկ կընտէ եկեղեցապատկան բոլոր կալուածների մանրամասն ուսումնասիրելը, այն որոշման եկաւ, որ պէտք է ուսումնասիրութիւնը կենտրոնացնել առ այժմ խոշոր կալուածների վրա և վերջիններիցս էլ գերադասութեան տալ այնպիսիներին, որոնք զբաղւում են երկաթուղիների կամ շուկաների մօտ և յարմարութիւն ունեն հեշտութեամբ վաճառահանելու կալուածների արդիւնաբերութեան նիւթերը: Այդ կալուածներն են՝ նախ Մարցի կալուածը Բօրչալուի գաւառում, որին կարելի է կցել նաև Հաղբատի ու Սանահնի կալուածները նոյն Բօրչալուի գաւառում և Հաղարձինը Ղազախի գաւառում, երկրորդ վարչապատի կալուածը Էջմիածնի գաւառում, երրորդ Փանձասարի կալուածը Զիվանչիի գաւառում և չորրորդ Չարէքավանքի կալուածը Փանձակի գաւառում: Այնուհետև գալիս են Խօթավանքը Զիվանչիի գաւառում, Տաթևը Չանգեզուրի գաւառում, Ախալքալակի կալուածները, Կարմիր վանքը, Նախավկան, Տայլարը և ուրիշ մանր կալուածները:

Առաջին կարգի կալուածների ուսումնասիրութեան հա-

մար յանձնաժողով կազմելու մասին անհրաժեշտ է հոգալ այժմեանից իսկ, որպէսզի կարելի լինի անմիջապէս գործի ձեռնարկել: Սեկցիան ենթադրում է, որ յանձնաժողովը իր առաջին տարուայ գործունէութեան հիման վրայ կարող կըլինի կազմել անտեսական ուրուագիծներ և ընթացք տալ բարեկարգութեան գործին: Այդ յանձնաժողովի անդամների վարձատրութեան և ուրիշ ծախքերի համար կը պահանջուի 3—5 հազար ուրլի, որպիսի գումարը պէտք է էջմիածինը յատկացնէ յիշուած նպատակի համար առանց յետաձգելու որովհետև ամեն մի յետաձգում այդ գործում հետացնում է մեզից կալուածների բարեկարգութեան սկզբնաւորութիւնը:

Ինչ վերաբերում է յետագայ տարիների ուսումնասիրութիւնների կազմակերպութեանը, սեկցիան այդ հարցի լուծումը որոշեց թողնել այն ղեկավարող վարչութեան ու մարմինին, որ կը կազմուի էջմիածնում կամ ապագայ համագումար ժողովներին:

Ստորև մի առանձին ցուցակում նշանակուած է յանձնաժողովների կազմը զանազան կալուածների վերաբերմամբ (տես Ա.)

Սեկցիան, մշակելով կալուածների ուսումնասիրութեան ծրագիր, նշանակել է այն գլխաւոր կէտերը, որոնց նա կարևոր համարեց ուսումնասիրութեան գործի լիակատարութեան համար: Անկասկած՝ ուսումնասիրող յանձնաժողովները իրանք կաւելացնեն մի շարք նոր կէտեր, որոնք հանդէս կը գան տեղական պայմանների քննութեան ժամանակ: Յանձնաժողովները, լինելով կազմուած հմուտ անձերից, չատ հեշտութեամբ կըմբռնեն այն շարժառիթները, որոնց շնորհիւ մուծվել են ծրագրի մէջ այս ու այն կէտը, ուստի և կարևորութիւն չէ զգացուում յատուկ բացատրական մեկնաբանութեան նրանց նշանակելու առիթով:

## II.

Վերջացնելով ծրագրի մշակումը Տնտեսագիտական Սեկցիան անցաւ իր պարապմունքների երկրորդ կէտին՝ այն է՝ տալ մի քանի ցուցումներ կալուածների կառավարութեան և նրանց մասնաւոր բարեկարգութեան մասին, մինչև որ կը

մշակութի և գործադրութեան կը յանձնուի տնտեսական ու-  
րուագծերի վերջնական ձևակերպութիւնը և խմբագրութիւնը:

Մարցի և Հաղարձին կալուածների վերաբերմամբ լսեց  
կառավարիչ Ս. Սահակեանի գեկույցումը, որը կցուում է ներ-  
կայ արձանագրութեան: Սեկցիան մանրամասն քննելով զե-  
կույցումը, ուշադրութեան արժանելով Մարցի կալուածքի հետ  
ծանօթ անձերի միւս տեղեկութիւնները, եկաւ այն եզրա-  
կացութեան, որ ներկայումս անկարելի է կազմել շահագոր-  
ծութեան մանրամասն ուրուագիծ, բայց հաստատապէս կա-  
րելի է յանձնարարել, որ 1) կատարուեն հարթաչափութեան  
(нивелировка) աշխատանքներ՝ նաւեր շինելու (желоба)  
նպատակով:

2. Սկսուեն բանակցութիւններ հարեան կալուածատէ-  
րերի, այլ և արքունական հողերի վարչութեան հետ շահա-  
գործութիւնը կազմակերպելու համար:

3. Աջողեցնել առանձին երկաթուղիական կայան (разъ-  
ѣздъ) բանալու Մարցի փայտի արտահանութեան համար:

4. Փորձ անել անտառից վառելափայտը ջրալող հաս-  
ցնելու մինչև ներքին մասերը:

5. Յանձնել մէկին ծանօթանալ անտառի ջրով փոխադրե-  
լու գոյքի հետ Քութայիսի նահանգում:

6. Հոգ տանել շահագործութեան պահանջելի 10-20,000  
րուբլու հայթայթման համար:

Ունենալով բոլոր նիւթերը և պարզած լինելով շահա-  
գործութեան հանգամանքները, պէտք է անմիջապէս դիմել  
Մարցի անտառի շահագործութեան, աչքի առաջ ունենալով  
առ այժմ վառելափայտի արտահանութիւնը:

Չաւեհալանքի վերաբերմամբ Սեկցիան խորհուրդ յայտ-  
նեց շարունակել առ այժմ եղած անտեսութիւնը, մինչև  
յատուկ յանձնաժողի ուսումնասիրութիւնները և աշխատել  
կալուածքի ազատ տեղերում հող տալ սակաւահող գիւղա-  
ցիներին:

Խօրալանքի վերաբերմամբ Սեկցիան խորհուրդ յայտնեց

1) Փորձեր անել ջրառատ մամանակներում Թառթառով  
իջեցնելու վառելափայտ և գերաններ, յատկացնելով դրա  
համար մի քանի հարիւր ոտբլի:

2. Հաւաքել գիւղացիներին կալուածքի մի կողմում, կապելով «Ուստա՛վնի գրամատաներ»:

3. Սակաւահող հայ գիւղացիներին հաստատել կալուածքի ազատ տեղերում:

4. Յանձնարարել կառավարիչներին՝ մինչև յատուկ մասնաժողովի ուսումնասիրութիւններ կատարելը ժողովել տեղեկութիւններ անտառների քանակի ու որակի մասին և պարզել գիւղացիների ցուցումներով հանքատեղեր:

Վաղարշապատ. Ջրի հարցը առաջ տանել, եղած փորձերի քննութիւնը. սխալներից խուսափելու համար հին ջրուղիների և ջրամբարների ուսումնասիրութիւնը, — Սեկցիան, լսելով ինժիներ Գ. Կիրակոսեանի բանաւոր գեկուցումը էջմիածնի հողերի ջրելու (ոռոգելու) խնդրի և իր արած փորձերի ու գիտողութիւնների մասին, այլ և այն, որ նա դեռ չէ վերջացրել իր աշխատանքը և յոյս ունի մինչև ամառ ջուր դուրս բերել 500 դեսեատին ոռոգելու համար, նաև միւս մասնագէտների խորհրդածութիւնները, եկաւ այն եզրակացութեան, որ Վաղարշապատի ընդարձակ հողերը ոռոգելու համար բաւականաչափ ջուր կայ թէ հողի սահմաններում և թէ չըջագայրում: Այդ ջուրը կարելի է վերցնել թէ ստորերկրեայ ջրի պահեստներից և հոսանքներից, թէ Աւ ջուր գետակից, թէ Քասախից և թէ Զանգուից: Ներկայումս դեռ չէ կարելի ճիշտ կերպով ասել թէ ոռոգման որ ձևը գերազանցի է ֆինանսական և տեխնիքական անսակէտներով և կարևոր են նորագոյն ուսումնասիրութիւններ յատուկ յանձնաժողովի ձևով, որը ուշադրութեան կառնէ թէ եղած վերջին փորձերը, թէ հին ջրանցքների և ջրամբարների աւերակները, թէ դարնան ջրերը, թէ ջրի հոսանքի ոյժի կէտերը և թէ ջրի հետ կապուած իրաւաբանական խնդիրները:

Յանձնաժողովի կազմը գանազան կալուածների ուսումնասիրութեան վերաբերմամբ:

I Մարցի և Հաղարձնի կալուածքի ուսումնասիրութեան համար կազմուելիք յանձնաժողովը պէտք է բաղկացած լինի հետևեալ անդամներից.

I. անտառագէտ, 2. հանքագէտ, 3. իրաւագէտ, 4. կա-  
ռավարիչ, 5. ներկայացուցիչ.

II Էջմիածին. 1. ինժիներ գեղրավլիկ. 2. ագրոնոմ.  
3. իրաւագէտ 4 » 5 »

III Գանձասար 1. անտառագէտ, 2. հանքագէտ, 3. իրա-  
ւագէտ 4 » 5 »

IV Չարեքավանք. 1. անտառագէտ. 2. հանքագէտ.  
3. ագրոնոմ 4 » 5 »

V Ախալքալաք 1. ագրոնոմ. 2. իրաւագէտ . . .

VI Կարմիր վանք 1. Ագրոնոմ.

VII Սօթավանք 1. անտառագէտ. 2. հանքագէտ. 3. իրա-  
ւագէտ 4 » 5 »

VIII Տաթև 1. Ագրոնոմ 2. հանքագէտ 3. իրաւագէտ.

Փոքր կալուածներ—կառավարիչը և մերձաւոր մասնագէտը:

Տնտեսագիտական Սեկցիան, քննելով կալուածների բարե-  
կարգութեան համար անհրաժեշտ գումարների հայթհայթման,  
այլ և տուրքերի կանոնաւորութեան, յարաբերութիւնների  
բարւոյթման և ուրիշ ինչիւրներ, կայացրեց մի քանի որոշում-  
ներ, որոնք են՝

I Կալուածքների շահագործութեան համար անհրաժեշտ  
գրամագլուխները ձեռք բերելու խնդրի վերաբերմամբ տնտե-  
սագիտական սեկցիան, քննելով խոշոր և մանր ձեռնարկու-  
թիւնների իրագործման հարցերը, եկաւ այն եզրակացութեան,  
որ պէտք է դիմել կողմնակի գրամագլուխների այն բոլոր  
դէպքերում, երբ էջմիածինը ինքը անկարող կըլինի կազմա-  
կերպել շահագործութիւնը իր սեփական միջոցներով:

Ենթադրելով, որ փոքր ձեռնարկութիւնների համար  
կարող են գտնուել գումարներ և էջմիածնի գրամարկում,  
Սեկցիան բարւոյք է համարում միջակ ձեռնարկութիւնները  
համար ընդունել անզական ընկերակցութիւնների գործակցու-  
թիւնը կամ կապալները, իսկ աւելի խոշոր ձեռնարկութիւն-  
ների համար նաև օտար կապիտալների աջակցութիւնը կամ  
կօնցեսսիաները:

II Յանկանալով տալ գիւղական համայնքներին հնարաւորութիւն օգտուելու ձեռնառու պայմաններով վանքապատկան հողերից, Տնտեսագիտական Սեկցիան նպատակայարմար է համարում հողերը տալ գիւղերին անմիջապէս, առանց միջնորդների:

III Սեկցիան նոյնպէս բարւոք է համարում որտեղ հնարաւոր է մասնատուէրքը վերածել փողատուրքի, որով գիւղացին կազատուի կամայականութիւնից, պատահականութեան ծանրութիւնից և տուրքի վերաւորական ձևից, միևնոյն ժամանակ վանքական կառավարութիւնն էլ կը ստանայ որոշակի գումարներ և կը լինի մշտապէս որոշ յարաբերութիւնների մէջ, ազատ լինելով թիւրիմացութիւններից:

IV Սեկցիան կարևոր է համարում կազմել եկեղեցապատկան հողերի ընդհանուր ցուցակ և նշանակել իւրաքանչիւր կալուածքի շրջանում եղած գոյքը, սխտեմի տակ դնելով եկեղեցապատկան կալուածքների վերաբերմամբ եղած բոլոր վաւերացումների և գործերի պահպանութիւնը:

V Սեկցիան նպատակայարմար ճանաչեց կալուածների ազատ հողերի վրայ, ուր յարմարութիւններ կան, ժողովել սակաւահող հայ գիւղացիներ և կազմել գիւղեր:

Սեկցիան իւր պարապմունքների ընթացքում, սկսած առաջին նիստից մինչև վերջինը, բազմաթիւ խնդիրներ քննելու ժամանակ գալիս էր այն եզրակացութեան, որ կալուածների բարեկարգութեան վերաբերութեամբ յայտնուած բոլոր բարի ցանկութիւնները կը մնան թղթի վրայ, եթէ չի լինիլ մի մարմին, մի հաստատութիւն, որը իրագործողի, ղեկավարողի և հսկողի պաշտօն վերցնի իր վրայ: Այդպէս օրինակ երբ հարց ծագեց դրամական միջոցներ գտնելու մասին ծրագրուող բարեկարգութիւնները իրագործելու համար, Սեկցիայում մասնակցող Ֆինանսական գործին ծանօթ անձերը առում էին, որ եթէ էջմիածինը չունենայ ինքը դրամական միջոցներ, հնարաւոր կը լինի փող դտնել դանազան ազբիւրներից, բայց փող տուղները կամ որոշ պայմաններով ձեռնարկութիւն սկսողները կը ցանկանան գործ ունենալ հեղինակաւոր և բոլորովին վստահելի հաստատութեան հետ, իսկ էջմիածինը իր ներկայ վիճակով գեւ չէ տալիս այդ

վատահոլութիւնը: Արք քննուում էր էջմիածնին առաջարկուած ձեռնարկութիւնների նպատակայարմարութեան խնդիրները, պարզուում էր, որ էջմիածինը չունի մի մարմին, որ կարողանար հեղինակաւոր կարծիք տալ ձեռնարկութեան մասին. (օրինակ ջրաբաշխութեան խնդրի) կամ հոգար մասնագէտների և յատուկ յանձնաժողովների միջոցով ձեռք բերել հեղինակաւոր կզրակացութիւն:

Այդ և դրանց նման ուրիշ նկատումները աչքի առաջ ունենալով Տնտեսագիտական Սեկցիան այն կտրական կարծիքն է յայտնում, որ մինչև չիրագործուի կալուածների կառավարութեան վարչական կազմակերպութիւնը, բարեկարգութեան նպատակով արած փորձերը մատնուած կլինեն անաջողութեան, ուստի Սեկցիան չէ կարող երաշխաւորել բարեկարգութեան ծրագիրների կենսունակութիւնը և արդիւնաւէտութիւնը մինչև իրագործութիւն ստացած չի լինի վարչական կազմակերպութիւնը:

Սեկցիայի նախագահ՝

Ա. Քալանթար

Անդամք՝ Ս. Չաւարեանց Ս. Սահակեանց

Գրիգոր Աղաբաբեանց Ա. Աթաբէգեան

Պ. Կանդուրալեան Մուշէ վարդապետ

Տ. Գեօղալեան Ա. Թաղէոսեան:

Յ. Մելիք-Բախտամեան

**ԿԱԼՈՒԱՅՆԵՐԻ ՈՒՍՈՒՄՆԱՍԻՐՈՒԹԵԱՆ ԾՐԱԳԻՐԸ:**

1. Հողը, տարածութիւնը, տօպօգրաֆիան, հողի տեսակները, նրանց յատկութիւնը. կլիմայական պայմանները, արդիւնագործութիւնը, մշակուող բոյսերը, շահագործութեան պայմանները, հողի վաճառագինը, կապալագինը:

2. Զուրք, ա. Ոռոգման ջրի տեսակները, գետեր, առուներ, ջրամբարներ, քեանրիզներ:

բ. Զրի պաշարը:

գ. Ոռոգում բնական ընթացքով և արհեստական միջոցներով:

դ. Զրի կարեքի չափը:



և. Ջրի պակասութիւնը լրացնելու միջոցներ (ջրի կարիքի չափի համաձայն) նոր քեանքիղներ, մանր հորերով ջուր հանելը, գարնան ջրերով ապահովել ամառուայ կարիքը. ինչ ծախք կարող է լինել ջուր դուրս բերելու համար:

Ջրագուրկ և ջրարբի հողի կապալագինը (1, 2, 3—4 անգամ ջրող) » » » » համեմատական արդիւնաբերութիւնը, ջուր դուրս բերելը գիւղացիների հետ միասին, Մելիօրատիվ կրեդիտի դերը. ջրի մեքենայական ոյժի մեծութիւնը և արժէքը. ջրի նշանակութիւնը իբրև փոխադրութեան միջոց. (փայտի և ուրիշ իրերի համար)

3. Անտառ. Անտառի դրութիւնը, խտութիւնը, անտառի յատակագիծը, ծառերի տեսակները, անտառի աստիճանը, անտեսութեան սխառմը, չրջանադարձ շահագործութիւնը (Система, Оборотъ рубки) շահագործութեան եղանակները, դերան, տախտակ, չափ, կլէօպկա, վառելիփայտ և ուրիշ մթերք պատրաստելու համար:

Վաճառահանութեան տեղերը և եղանակները՝ քաղաք, կայարան, գործարան, փոխադրութեան միջոցները՝ ա. սայլով, բ. ջրալող СПЛАВЪ, գ. նաւերով: Շահագործութեան պայմանները, փոխադրութեան արժէքը, դները: Անտառի ո՞ր մասը կարելի է վարելահող կամ այգեհող դարձնել:

4. Արօցներ և խոտաբուրքեր.

Նրանց դիրքը և տարածութիւնը, Որակութիւնը,

Ո՞ր տեղերը կարելի է վարելահող և այգետեղ դարձնել, գիւղացիների մշտական բռնած տեղերը, Սերվիտուտների որոշումը, կապալագինը կամ տարեկան տուրքերը, ինչպէս կարելի է բարելաւել շահագործութիւնը:

5. Հանքեր, հանքերի տեղերի ճիշտ նշանակումը, հին հանքերի տեղերը, հանքերի տեսակները, նկարագրութիւն հանքատեղի, հին մշակութեան մասին նիւթեր, որտեղ պէտք է կատարել իրակատար ուսումնասիրութիւն.

Շահագործութեան տեղական հանգամանքները ու պայմանները, վաճառահանութեան պայմանները, շահագործութեան ծրագիրներ.

6. Յարաբերութեան խնդիրները.

ա. Գիւղացիների վերաբերութեամբ, ներկայ դրութիւնը.

մասնատուրքի վերածուժը փողատուրքի, պարտաւորեալ յարարելութիւնների վերացման համար նիւթեր.

բ. Ուրիշ կալուածների և կառավարութեան վերաբերութեամբ հողային հարկ, նրա համապատասխանութեան աստիճանը:


7. Վաւերաթղթեր. ցուցակ կալուածների թէ խոշոր և թէ մանր. յատակագիծներ—դոկումենտներ հողի, ջրի, ջրաղացների և այլն պատճէններ:

8. Հաղորդակցութիւն.

Յամաքով՝ երկաթուղի (նոր կայարաններ շինելու անհրաժեշտութիւնը). խճուղի, ճանապարհներ գիւղամէջ և դէպի լեռները, կամուրջներ, (կղածները և հարկաւորները) ջրով մեծ գետեր կղած տեղերում, սալ (պարօմ), նաւակ, ինչ կը նստէ հաղորդակցութեան ճանապարհների բարւոքումը, սրբան կարելի է գործել տեղական ազգաբնակչութեան հետ միասին:

9. Գիւղ գծելը կալուածների ազատ տեղերում.

Որոշել հողերի տարածութիւնը և սահմանները, աչքի առաջ ունենալ այդպիսի տեղեր Վաղարշապատի, Չարեքավանքի, Խօթավանքի, Հաղարծինի, Կարմիր վանքի, Նախավկայի, Տայլարի և ուրիշ տեղերում:



ՎՍՐՉԱԿԱՆ ԻՐԱՒԱԿԱՆ ՍԵՎՑԻՍՅԻ

ԶԵԿՈՒՑՈՒՄՆ:

Վարչական—Ֆրանսական սեկցիայի ժողովները կայացել են Սինոդի անդամ Տ. Բարդէն վարդապետ Ալաուելիանի նախագահութեամբ, քարաուղարի պաշտօնը կատարել է իրաւագէտ պ. Սիրական Տիգրանեանը, իսկ ժողովներին մասնակցել են իրաւագէտներ՝ պ. պ. Ղամբարեան Պողոս, Յարութիւնեան Սամսօն, Տիգրանեան Նազարէթ, Սպինդարեան Յովհաննէս, Արծրունի Սենեքերիմ, Ամիրխանեան Յովսէփ, Խաչատրեան Սմբատ, Դուրխանեան Մարկոս, Սահակեան Աւետիք, Քալանթարեան Նիկողայոս, Յովհաննիսեան Տիգրան, Կուսիկեան Արչակ Սեկցիան մի շարք խորհրդակցութիւններից յետոյ ամփոփեց իւր ասելիքները հետեւեալ զեկուցման մէջ:

Վանքապատկան դպրերի շահագործման աննախանձելի պակասութիւնների հիմնական պատճառը նրանց կառավարման աննպատակայարմար և անկարգ ու անկանոն եղանակն է, որն իւր ներկայ անկերպարան վիճակից անհրաժեշտ է վերածել ըստ ամենայնի պատշաճաւոր և վստահելի մի այլ ձևի:

Կառավարման այս լուազոյն ձևն որոշելու ձեռնամուխ լինելիս՝ Սեկցիան գործնական չարժաւիթներից զրգուած, մտադրուեց ոչ թէ ցանկալի նորմաների մի բալորովին նոր նախագիծ յօրինել իւր կողմից, այլ, տիրող կանոնական ու օրինական հողի վրայ կանգնած մնալով, պարզել, մեկնաբանել և արձանագրել այն դրական կարգերը (թէ եկեղեցական և թէ պետական ծաղում ունեցող), որոնք՝ իբրև de jure պարտադիր գորութիւն վայելող եղանակներ՝ անցապաղ պէտք է գործադրութեան ասնուին նաև de facto երականանալու մեր եկեղեցու կառավարութեան համապատասխան շրջաններում: Աշակեիք դրական կարգերը պէտք է գործադրուեն թէ վանքապատկան և թէ եկեղեցապատկան կայքերի վերաբերմամբ:

Գալով այդ գրական կարգերի որպիսութիւնն որոշելուն, Մասնաժողովը նախ հաստատեց, որ վանքապատկան կաթերը մեր եկեղեցու տնտեսութեան թեմական շրջանին պատկանելով ըստ տնօրէն իրաւատիրոջ (ինչպէս որ առանձին եկեղեցիներին պատկանող կայքերն եկեղեցու տնտեսութեան ծխական շրջանին են վերաբերում, ծխական ժողովը իբրև իրաւատէր տնօրէն ունենալով), իւրաքանչիւր թեմում զտնօրէն բոլոր վանքապատկան կայքերի գլխաւոր կառավարիչն ու կարգադրիչը հանդիսանում է՝ թե՛ մեր եկեղեցու կանոնական կարգի եւ թե՛ ռուսաց պէտական օրէնսդրութեան համաձայն՝ թեմական պատգամաւորական ժողովը: Իսկ եկեղեցական կայքերի վերաբերմամբ թեմական ժողովը պէտք է լինի վերահսկող և քննող նրանց կառավարութեան, շահագործման գործը, ինչպէս և ել ու մուտքը:

Պետութեան օրէնքի կողմից այս թեմական ժողովի իրաւական գոյութիւնը ճանաչուած է եղել դեռ 1836 թուի պոլսթենիայով (յօդ. 1120) կաթողիկոսական ընտրութեան համար թեմի կողմից պատգամաւոր ընտրելու առիթով: Նոյն առիթով թեմական ժողովը աւելի մանրամասն կարգադրուած էր նախկին Փոխարքայի 1865 թ. կանոններում: Վերջապէս աւելի լիակատար ձևով նոյն թեմական ժողովի գումարման եղանակն ու կազմը որոշուած են ներկայ Փոխարքայի ժամանակաւոր կանոններում (տես Բ. մասն) արդէն թեմական դպրոցների կայքերի կառավարման առիթով (յայտնի է, որ թեմական դպրոցների տնտեսութիւնը կապուած է մեր եկեղեցու տնտեսութեան հետ):

Թեմական Առաջնորդը մասնակցում է վանքապատկան կայքերի կառավարմանը նոյն թեմական ժողովում, իբրև այդ պատգամաւորական կողմի մի նախագահ (տես ժամանակաւոր կանոններ Բ. մասն յօդ. 2):

Թեմական ժողովը կազմում է իւր թեմի թեմական երևտի նախահաշիւը, որի մէջ մտնում են նաև թեմում գտնուող վանքապատկան բոլոր գոյքերը, սահմանուած է այն եղանակները ու օրգանները, որոնք վանքապատկան կայքերի անմիջական և ընթացիկ վարիչներն են լինելու և գործելու են պատասխանատուութեամբ և հաշւետուութեամբ նոյն թեմական ժողովի առաջ:

Թեմական ժողովները, իւրաքանչիւրը իւր թեմի համար, ըստ կայքերի և տեղական պայմանների ուրոյնութեան մշակում են նպատակայարմար հրահանգներ թեմական ամբողջ անտեսութեան, նմանապէս և վանքապատկան կայքերի կառավարման համար: Առանձին վանքապատկան կայքերի անմիջական կառավարութիւնը կարող է յանձնուել տեղական գործակալական կամ Յաջորդական վիճակային ժողովներին՝ գործակալ քահանայի կամ Յաջորդի նախագահութեամբ, ըստ որոշման թեմական ժողովի:

Թեմական ժողովը ընտրում է մի մշտական թեմական խորհուրդ . . . հոգուց չորս տարով ընթացիկ հակողութեան, կարգադրութիւնների համար համաձայն թեմական ժողովի որոշումներին և հրահանգներին:

Թեմական ժողովի պատգամաւորական կազմի լիազօրութեան ժամանակամիջոցը չորս տարի է, որի լրանալու դէպքում Թեմական Առաջնորդը վաղօրօք պատշաճաւոր կարգադրութիւններ է անում նոր պատգամաւորական ընտրութիւնների մասին (տես ժամանակ. կանոններ Բ. մասն, յօդ. 2):

Իւր լիազօրութեան քառամեայ ժամանակաշրջանում թեմական ժողովը գումարուելու է առ նուազն տարին մէկ անգամ հաշուետուութիւն ընդունելու և կարգադրութիւններ անելու (տես պօլօթենիա յօդ. 1211): Պատգամաւորներին թեմական ժողովի կարող են հրաւիրել վեհափառ կաթողիկոսը, էջմիածնի Սինօդը, նոյն թեմի Առաջնորդը, թեմական վերաստուգող յանձնաժողովը, (տես ժամանակ. կանոններ Բ. մասն, յօդ. 5):

Թեմական ժողովներից բարձր է կեդրոնական ժողովը, Ռուսահայոց բոլոր թեմերի ներկայացուցիչներից կազմուած: Կենդրոնական ժողովը իրաւունք ունի քննելու և հաստատելու թեմական ժողովների կազմած նախահաշիւները և հաշիւները, փոփոխել այն, հետեւելով հաւասարութեան սկզբունքին. որպէս զի վանքապատկան կայքերը, որոնք ազգային և կեղեցական ընդհանուր սեփականութիւն են, զանազան թեմերի միջև անհաւասար չափով բաժանուած լինելով, թե-

մերից մէկը անորդարապէս պակաս, միւսն անհաւասարապէս աւելի օգտուելիս չլինի գրանցից:

Մի քանի թեմերում արդէն անցեալ տարի պատգամաւորների ընտրութիւնը կատարուած և թեմական ժողովները կազմուած և մէկ անգամ դումարուած լինելով Փոխարքայից հաստատուած կանոնների համաձայն, այժմ պէտքէ անյապաղ կարգադրութիւն անել բոլոր թեմերում թեմական ժողովներ դումարելու մասին, և ապա ձեռնարկել նաև կենդրոնական ժողով հրաւիրելու:

#### ՀՈԿՏԵՄԲԵՐԻ 14-ԻՆ

Սեկցիան հաստատեց նախորդ նիստի կզրակացութիւնները և արձանագրութիւնը:

Պ. Յովհաննէս Սպենդիարեանը առաջարկեց Էջմիածնապատկան կաջքերի կառավարման համար մի առանձին քացառիկ կզանակ ու վարչութիւն սահմանել, որպէսզի մինչդեռ միւս բոլոր վանքերի կաջքերը կառավարելու են թեմական ժողովների տնօրէնութեամբ, Էջմիածնի կաջքերը (զոնէ վանքին կից գոնուողները) յանձնուեն մի յատուկ հաստատութեան: Իւր առաջարկը պ. Սպենդիարեանը ձեւաբանեց այսպէս՝ «Էջմիածնում հիմնել մի առանձնայատուկ վարչական — տնտեսական խորհուրդ, տեղական ժողովրդի ընտրութեամբ, նախագահութեամբ Էջմիածնի միաբանութեան ներկայացուցչի և իրաւասութեամբ թեմական խորհրդի, այդ խորհուրդը ենթարկուելու է կենտրոնական ժողովի իրաւասութեան»: Այս բանաձևը քուէարկութեան դրուելով՝ մերժուեց: Այնուհետև մասնաժողովը ձայների ճնշող մեծամասնութեամբ մերժեց առհասարակ որևէ քացառութիւն սահմանելու կարևորութիւնը, հաստատելով որ Էջմիածնապատկան կաջքերը, միւս բոլոր վանքերին պատկանող կաջքերի նման միևնոյն ընդհանուր եղանակով պիտի կառավարուեն, այսինքն համապատասխան թեմերի թեմական ժողովներով, որոնց նախահաշիւները և գործունէութիւնը ենթարկուելու են կենտրոնական ժողովի վերահսկողութեանը:

Վերջապահելով կաջքերի կառավարման, շահագործման

խնդիրը, Մասնաժողովը դիմեց ելեմականին, ստացուելիք եկամուտների և գումարների տնօրինման խնդրին:

Աչքի առաջ ունենալով, որ էջմիածինը տիրող եկեղեցական—վարչական բաժանման տեսակէտից թեմերից առանձին մի միութիւն է հանդիսանում (թեմի մէջ չէ մտնում) և մանաւանդ ունի կարեօր հաստատութիւններ և բարդ բիւտջէ, առաջարկութիւ եղաւ, որ էջմիածնի ներքին տնտեսութեան համար առանձին «էջմիածնի խորհուրդ» կազմուի, ձեւարանի, միաբանութեան և վանական այլ խնդրերոյն հաստատութիւնների ներկայացուցիչներից բաղկացած, որն և ենթարկուի անմիջապէս Կենդրոնական ժողովին: Էջմիածնի խորհուրդը կը կազմէ և կիրառործէ էջմիածնի նախահաշիւը Կենտրոնական ժողովի հաստատմամբ և վերահսկողութեամբ:

Կարծիքներ յայտնուեցին, որ եթէ միւս վանքերին պատկանող կաշքերի եկամուտները ստանալով թեմական ժողովները կարող են անարգել տնօրինել այն իրենց թեմի պէտքերի համար, ապա էջմիածնապատկան կաշքերի եկամուտների նկատմամբ պէտք է որոշ սահմանափակում դնել, որպէսզի էջմիածինն իւր վարչական և կուլտուրական հաստատութիւններով նիւթական ապահովութիւնից չզրկուի: Ի հարկէ, Մասնաժողովի վերևում ծրագրուած միջոցները՝ բարւոքելով էջմիածնի կաշքերի շահագործման եղանակները՝ անշուշտ արդիւնաւորելու են գրանցից մինչև այսօր ստացուող եկամուտների քանակութիւնը. հետևապէս, նիւթականի կողմից ընդհանրապէս արգելք չէ լինելու էջմիածնի ցայսօր վայելած ապահովութիւնը խախտելու կամ պակաս չափով պահպանելու նաև ապագայում: Սակայն և այնպէս ցանկութիւն յայտնուեց, որ այդ ապահովութեան խնդիրը իւր բաւարար լուծումն ու գրաւականն ունենայ նաև բիւտջետային կարգերում: Այս առիթով առաջարկեցին, որ թէ էջմիածնի խորհրդի կազմելիք էջմիածնի նախահաշիւը, (ուր որոշուեն էջմիածնի նիւթական պէտքերը) և թէ թեմական ժողովների կազմելիք թեմական նախահաշիւները (ուր ի միջի այլոց նշանակուելու են էջմիածնապատկան կաշքերի ելքն ու մուտքը) առաջարկուեն ի հաստատութիւն Կենդրոնական ժողովին, որն և աչքի առաջ կունենայ անշուշտ թէ էջմիածնի հաստատութիւնների քսկական պէտքերի չափը և թէ էջմիածնապատկան կաշքերից

ստացուելիք և կամուտների արդար քանակը, ու ըստ այնմ էլ կը քննէ ու կը հաստատէ իրեն առաջարկուած նախահաշիւները:

### 17 ՀՈԿՏԵՄԲԵՐԻ.

Կարգացուեց և հաստատուեց նախորդ նիստի արձանագրութիւնը:

Մասնաժողովը կրկին անգամ քննութեան առնելով նախորդ նիստերում տեղի ունեցած խորհրդակցութիւնների եզրակացութիւնները, և համաձայնութեան գալով, որոշեց ձեռնարկել այդ կօնկրէտ յօդուածներով, սակայն միայն հիմնական կազմակերպչական կանոնները, թողնելով մանրամասն հրահանգների և անհրաժեշտ կանոնադրութիւնների յօրինումը առաջիկայ թեմական և կենդրոնական ժողովներին, որոնց ուշադրութեան առաջարկելու համար Մասնաժողովն ինքն էլ պատրաստելու է իւր կողմից այդ հրահանգների և կանոնադրութիւնների նախագծերը:

Իսկ ներկայումս Մասնաժողովն անհրաժեշտ է համարում ներկայացնել Ս. Էջմիածնի Սինոդին՝ Նորին Վեհափառութեան հաւանութեան և պատշաճաւոր կարգադրութեան մատուցանելու՝ թեմական ժողովներ հրաւիրելու առաջարկը յետագայ հիմունքներով, որոնք չարադրուած են ի հետևումն և ի զարգացումն «Պօլօթենիայի» մի քանի յօդուածների և ներկայ ֆոխարքայի ժամանակաւոր կանոնների:

Սկեղեցական եւ վանքապատկան կալուածների կառավարութեան եւ Եանագործման համար սահմանում են հետեւեալ մարմինները:

Ա. Ծխական ժողովը 1) կառավարում է և շահագործում ծխական եկեղեցուն պատկանող կալուածները և սահմանում է ծխական տուրք:

2) Իրագործում է իր շրջանում բոլոր կուլտուրական կրթական գործերը:



3) Ընտրում է իբրև գործադիր մարմին ծխական խորհուրդ մի տարի ժամանակամիջոցով, սրբ շարունակում է կատարել իւր պարտականութիւնները մինչև նորի ընտրութիւնը:

4) Քննում է ծխական խորհրդի միջոցով կազմած տարեկան ելևաւից բիւտջևտը:

Ծխական ժողովը գումարւում է իւրաքանչիւր տարի ոչ պակաս քան մէկ անգամ. բացստիկ ղէպքերում կարող է գումարուել և արտակարգ ժողով:

Ծխական ժողովի տարեկան տեղեկագիրը ներկայացւում է թեմական պատգամաւորական ժողովին, որին վերապահւում է հսկողութեան իրաւունքը ձխի գործունէութեան վերաբերեալ:

Բ. Իւրաքանչիւր թեմում գանուող բոլոր վանքապատկան կաթերի գլխաւոր կառավարիչն ու կարգադրիչը թեմական պատգամաւորական ժողովն է՝ իբրև ընդհանուր անօրէն թեմական ամբողջ կառավարութեան:

Գ. Թեմական ժողովի պատգամաւորական կազմը ընտրւում է շրտ տարի ժամանակով յետագայ եղանակով. (տես ժամանակ. կանոններ Բ. մասն յօդ. 2):

Դ. Թեմական ժողովի կազմի լիազօրութեան քառամեայ ժամանակաշրջանը լրանալուց առաջ թեմական խորհուրդը Առաջնորդի գիտութեամբ վաղօրօք պատշաճաւոր կարգադրութիւններ է անում նոր պատգամաւորական ընտրութիւնների մասին:

Հին պատգամաւորների լիազօրութիւնը շարունակւում է մինչև նորերի ընտրութիւնը:

Ե. Թեմական ժողովն տարեկան ունենալու է անուագն մէկ նստաշրջան թեմական ժողովից որոշուած ժամանակին: Արտակարգ նստաշրջանի թեմական ժողովը կարող է հրաւիրուել Վեհափառ կաթողիկոսից, Էջմիածնի Սինօզից, Թեմական խորհրդից և պատգամաւորների անուագն 1/3-ից:

Զ. Թեմական Առաջնորդը մասնակցում է վանքապատկան կաթերի կառավարմանը թեմական ժողովում՝ իբրև այդ պատգամաւորական կողմիւմի նախագահ:

Է. Թեմական ժողովներն իւրաքանչիւրն իւր թեմի համար ըստ կաթերի և տեղական պայմանների ուրոյնութեան

հրահանգներ և կանոնադրութիւններ են սահմանում թեմական ամբողջ անտեսութեան, նմանապէս և վանքապատկան կայքերի կառավարութեան համար:

Թեմական ժողովի իրաւասութեան ենթակայ են տեղական մասնաժողովները կամ գործակալութիւնները, որոնց անմիջական կառավարութեան և շահագործման են յանձնուում յիշեալ կալուածները համաձայն այդ ժողովում ընդունուած ծրագիրների և հրահանգների՝ այդ ժողովների թիւն իւրաքանչիւր թեմում և գործունէութեան չրջանն որոշում է թեմական պատգամաւորական ժողովը:

Է. Թեմի բոլոր վարչական հաստատութիւններն ու պաշտօնեաները պարտաւոր են հաշուետւութեամբ ու պատասխանատւութեամբ թեմական ժողովի առաջ:

1) Իւրաքանչիւր թեմի շրջանում գտնուած բոլոր կուրատորական կրթական և այլ հաստատութիւնները ենթարկուած են թեմական պատգամաւորական ժողովի հսկողութեան:

2) Թեմական պատգամաւորական ժողովը պարտաւոր է հոգալ իւր թեմում գտնուած անբակ եկեղեցիների և վանքերի պահպանութեան մասին:

Թ. Թեմական ժողովը ամեն տարի կազմում է իւր թեմի թեմական երևոյթի նախահաշիւը, որի մէջ են մտնում նաև թեմում գտնուող բոլոր վանքապատկան կայքերի եկամուտները:

Ժ. Թեմական պատգամաւորական ժողովը ընտրում է իբրև գործադիր մարմին շորս տարի ժամանակամիջոցով թեմական խորհուրդ՝ նախագահութեամբ թեմական Առաջնորդի կամ նորա ներկայացուցչի:

ԺԱ. Թեմական ժողովները հաշուետու և պատասխանատու են Կենդրոնական ժողովի առաջ:

ԺԲ. Կենդրոնական ժողովը կազմում է իւրաքանչիւր թեմից և Ա. էջմիածնի կողմից ընտրուած պատգամաւորներից նախագահութեամբ Վեհափառ կաթողիկոսի կամ Նորա ներկայացուցչի:

ԺԳ. Կենդրոնական ժողովը իրաւունք ունի փոփոխութիւն մտցնել էջմիածնի նախահաշուի և թեմական ժողովների կազմած թեմական նախահաշիւների մէջ: Այս փոփոխութիւններն անկիս Կենդրոնական ժողովը պէտք է աչքի առաջ ունենայ՝

ա) Հաւասարութեան սկզբունքը, որպէսզի վանքապատ-  
կան կայքերը, քանի որ ընդհանուր ազգային եկեղեցական  
սեփականութիւն են, զանազան թեմերի միջև անհաւասար  
բաժանում լինելով, թեմերից մէկն անարդարապէս պակաս,  
միւսն անհաւասարապէս աւելի օգտուելիս չլինի դրանցից:

բ) Էջմիածնի հաստատութիւնների պէտքերի չափը եւ  
էջմիածնական կայքերի եկամուտներից թեմերից Էջմիածնի  
գանձարանին հասանելիքի արդար քանակը:

Նախագահ Վարչական—Իրաւական Սեկցիայի՝

Անդամ Սինօզի Բարգէն վարդապետ

Անդամք՝ Սենեքերիմ Արծրունի

Մամսոն Յարութիւնեան

Յովհաննէս Սպենդիարեան

Պօղոս Ղամբարեան

Աւետիք Օանակեան

Ժ. Գ. յօդ. հետ համաձայն չեմ Սմբատ Խաչատրեան

Յովսէփ Ամիրխանեան

Քարաուղար Սիրական Տիգրանեան.

**ՄԱՅՐ ԱԹՈՒԻ ՍԵՊՆՍԿԱՆ ԿԱՆՈՒՆԵՐԵՐԸ**

Որպէսզի ընթերցողները Ս. Էջմիածնի կալուածների  
բարեկարգութեան համար կազմած գրքիս մէջ զետեղուած  
ծրագիրների հետ միաժամանակ տեղեկութիւններ ունենան  
այդ կալուածների մասին՝ բերում ենք այստեղ բոլոր  
կալուածների համառօտ ցուցակը՝ զնկելով իւրաքանչիւրի դի-  
մաց նորա տարածութեան և բերած արդիւնքի մօտաւոր  
չափը՝ քաղելով ներկայ 1908 թ. Սինօզում եղած սրայմա-  
նաթղթերից և այլ գործերից:\*)

1. Վաղարշապատ գիւղ՝ ունի 7312 դեա. 1890 քառ.  
սաժ. տարեկան արգիւնք տալիս էր նախկին տարիներում  
20—16 հազար ուռը. վերջին տարիներում 10 հազարից մինչև  
11 հազար հինգ հարիւր ուռը, արգիւնք:

\*) Ս. Էջմիածնի կալուածների մասին ընթերցողը կարող է նաև  
գտնել տեղեկութիւններ Տ. Մինիթար վարդապետի «Նայերը Ռուսաստ-  
նում» գրքի մէջ: Վաղարշապատ, 1906.

Վաղարշապատում գտնուած վանքի ա) հինգ այգիներից տարեկան զուտ արգիւնք 2000 ուռլի, բ) սեպհական վարելահողերից միջին թուով 2500 ուռլ, գ) ներքին զօրուղից 8405 ու. խօտահարքից 2500, բամբակից 1000 ու.:

2. Եղուարդ գիւղ՝ 10106 դես. 1200 քառ. սաժ. տարեկան արգիւնք տալիս էր միջին թուով 10 հազար ուռլ, իսկ վերջին երեք տարին տարեկան մօտ 3—4 հազար ուռլ.

3. Օսական գիւղ՝ 4057 դես. 74 քառ. սաժ. միջին թուով տարեկան սոււել է 5—6 հազար, վերջին տարին երեք հազար ուռլ :

4. Մասուրա գիւղ՝ 5870 դես. միջին թուով տալիս է տարեկան 4000 ուռլ. իսկ վերջին երկու տարում մօտ 2000 ուռլ. տարեկան:

5. Բջնի գիւղ՝ իւր անտառով և արօտատեղիներով 5344 դես, 74 քառ. սաժ. տարեկան 3 հազար ուռլի, անտառից ոչինչ:

6. Մուղնի գիւղ՝ 981 դես. 1080 քառ. սաժ. տարեկան 500 ուռլի:

7. Գեօկ քիլիսա՝ գիւղի  $\frac{1}{16}$  մասը և մի կտոր հող մօտ 200 դեսեասին՝ տարեկան 240 ուռլի:

8. Քիւզաչի գիւղ՝ վանքի մասը 195 դես. տարեկան 258 ուռլի:

9. Երկու այգի Օշականում՝ 25 դես. տարեկան 650 ուռլ.:

10. Երեք այգի Աշտարակում՝ 5 դես. տարեկան 617 ու.:

11. Մի այգի Փարաքարում՝ 7 դես. 1449 քառ. սաժ. տարեկան 360 ուռլի:

12. Երկու այգի Երևանում՝ մօտ 5 դես. տարեկան 906 ու.:

13. Երկու այգի Թիֆլիսում՝ 2 դես. տարեկան 620 ուռլ.:

14. Մի այգի Գանձակում՝ 4 դես. տարեկան 250 ուռլ.:

15. Ամբերդի արտատեղին՝ 440 դես. 810 քառ. սաժ. 157 ուռլի:

16. Ղըռ արօտատեղի Վաղարշապատում՝ 400 դեսեատ. 266 ուռլի:

17. Մի կտոր հող Վերին Թալինում՝ 15 դես. 1440 քառ. սաժ. վէճի պատճառով արգիւնք չէ բերում:

18. Երկու պարտէզ Ախալցխայի Միրող գիւղում՝ 1 դես. արգիւնք 40 ուռլի:

19. Գետարգելի վարելահողը՝ 540 դեսեսատ. տարեկան 1500 ուռելի:

20. Դայլարի վարելահողը (Ղարսի վիճ.) 615 դես. 800 ուռ. սարին:

21. Մարցայ անտառները (Թիֆլիսի վիճ.) 7864 դես. 320 քառ. սափ. 400 ուռելի արդիւնք:

Այսպիսով Մ. Աթոռի հողերի ընդհանուր տարածութիւնն է 45188 դես., որից ստացւում է տարեկան մօտ 47,469 ուռ. սրանից հանելով հողային և երկրաչափական հարկերը 2,500 ուռ. մնում է զուտ արդիւնք մօտ 44,969 ո. այսինքն իւրաքանչիւր դեսեսատինից միջին թուով 954 $\frac{1}{2}$  կոպ.:

Բացի վերոյիշեալ հողերից, անտառներից և այգիներից Մ. Աթոռն ունի նաև հետևեալ անշարժ կալքերը.

1. Վաղարշապատում ա) 3 տուն՝ ստացւում է միայն մի տնից 276 ուռելի: բ) Երկու ջրաղաց 1100 ուռելի: գ) Շուկայից դուրս 11 կրկապ տարեկան 1137 ուռելի, դ) Շուկայում 186 կրպակ—տարեկան 2000 ուռելի, խանութներից մեծ մասը դատարկ են. ե) մի քարհանք 300 ուռ. զ) Անտառ—է դրօսավայր: Ընդամենայն 4813 ուռելի:

2. Ախալցխայում մի տուն 208 ուռելի.

3. Ալէքսանդրապօլում 28 կրպակ և մի շտեմարան՝ արդիւնք տարեկան 2307 ուռ. վերջին երկու տարին ոչինչ չէ ստացւում—որոշ պայմանով յանձնուած լինելով հողաբարձութեան տեղայն:

4. Ախալքալաքում մի կրպակ 185 ուռ.

5. Գանձակում կրպակ և քարվանսարա 800 ուռելի:

6. Թիֆլիսի էջմիածնապատկան աներից և խանութներից մօտ 13,000 ուռելի:

7. Քիչնեի շինութիւններից տարեկան 24,000 ուռելի, արդէն լրանում է երկու տարին, որ արդիւնք չենք ստանում վէճի պատճառով:

8. Երևանում 3 ջրաղաց 500 ուռ.

9. » 5 կրպակ 310 ուռ.

Ուրեմն վերոյիշեալ անշարժ կալուածքներից Մ. Աթոռ ստանում է տարեկան 43,816, ընդամէնը 88,785 ուռ.:

Պէտք է այստեղ նկատել, որ կալուածքների արդիւնքը զգալի չափով պակասել է նախկին տարիների համեմատու-

թեմեր: Մէկ կողմից թէ գիւղացիք և թէ կապալառուները իւր ժամանակին չեն վճարում և խոյս են տալիս լքիւ և կանոնաւոր վճարելուց, միւս կողմից էլ կալուածքները չեն շահագործում կանոնաւոր, այնտեղ՝ որտեղ կարելի է ծախս անել կրկնապատիկը ստանալու համար՝ չէ անուում և ընդհակառակը եղածներն էլ հետզհետէ կորցնում են իրենց արժէքը:

**ԹԵՄԵՐԻ ԿԱԼՈՒԱԾՔՆԵՐԸ.**

Առ այժմ հնարաւորութիւն չունենալով այտեղ մանրամասն նշանակել թեմերի բոլոր կալուածքները յականէ անուանէ՝ ընդհանուր գաղափար կազմելու համար բերում ենք թեմերում գտնուած վանքերի կալուածքների ընդհանուր տարածութիւնն և մուտքը:

1. Նոր Նախիջեւանի թեմ: Այս թեմի երեք վանքերը միասին ունեն մօտ 4418 դեա. հող, որ տարեկան բերում է 13,085 ոււր. արդիւնք, որից հանելով հողային հարկ 60 ա. մնում է արդիւնք 13,025 ա. այսինքն իւրաքանչիւր դեսեատինից միջին թուով 2 ա.—95 կոպ.:

2. Աստախանի թեմ: Թեմում վանքական հող չկայ, միայն քաղաքում կայ 60 դեա. հող, որի տարեկան 150 ա. արդիւնքը յատկացուած է առաջնորդական տան:

3. Շամախու թեմ: Այս թեմում գտնուած երկու վանքը միասին ունեն մօտ 79 դեա. որից ստանում են տարեկան 1830 ա. արդիւնք, հանելով հողային հարկը 20 ոււր. մնում է տարեկան արդիւնք 1810 ա. դեսեատինից միջին թուով 22 ա.—91 կոպ.:

4. Ղարաբաղի թեմ: Սոյն թեմի 14 վանքը միասին ունին մօտ 58,698 դեա. հող, որից ստացւում է տարեկան մօտ 6700 ա. արդիւնք: Ստացուած գումարից հանելով երկրաչափական և հողային հարկը 3768 ա. մնում է արդիւնք 2992 ա. այսինքն իւրաքանչիւր դեսեատինից տարեկան միջին թուով 5 կոպ.: Այս թեմում են գտնուում Գանձասարի (11,125 դեա.), Խօթայ (45,997 դեա.), Ճալէթի (407 դեա.) նշանաւոր անտառները:

5. Երեւանի թեմ: Այս թեմի 48 վանքը միասին ունեն

մտաւորապէս 32,440 դեռ, հող, որից ստացւում է տարեկան մօտ 17,190 ոււրլի արդիւնք, հանելով 706 ոււրլի հողային և կրկրաչափական հարկը, մնում է արդիւնք 16,484 ուայտինքն իւրաքանչիւր դեռեատինից միջին թուով 50 կոպ.:

6. Վրաստանի և Իմերեթի թեմ: Այս թեմի 17 վանքը միասին ունեն մտաւորապէս 12,250 դեռ. հող, որից տարեկան արդիւնք ստացւում է 3500 ու. հանելով 420 ոււրլի պետական հարկը՝ մնում է 3080 ոււր. այտինքն իւրաքանչիւր դեռեատինից միջին թուով արդիւնք 25 կոպէկ: \*)

Մայր աթոռը և Ռուսաստանի Հայոց վեց թեմերի վանքերը միասին ունեն մտաւորապէս 153,133 դեռ. հող, որից ստացւում է տարեկան 80,605 ոււրլի արդիւնք, իւրաքանչիւր դեռեատինից միջին թուով 52<sup>1</sup>/<sub>2</sub> կոպ.:

ՏԵՂԵԿԱԳԻՐ Ա, Բ, Գ, Դ, 1906 թ.

(ВѢДОМОСТЬ А. Б. В. Г. 1906 г.)

Որպէսզի ընթերցողները հնարաւորութիւն ունենան իմանալու մեր 6 թեմերում գտնուած եկեղեցիների, քահանաների, ծխականների և եկեղեցիների դրամադուլունների քանակը՝ այստեղ համառօտակի առաջ ենք բերում այդ տեղեկութիւնները մօտաւոր իսկութեամբ՝ հանելով ս. էջմիածնի Սինօդի 1906 թ. Տեղեկագրից: Որքան որ այդ տեղեկութիւնները, մանաւանդ ծխականների թիւը, ճիշտ կերպով չհամապատասխանեն իրականութեան՝ այնուամենայնիւ իրենց մէջ պարունակում են մօտաւոր իսկութիւն:

Ա. Երեւանի թեմում կայ 652 եկեղեցի, 18 վանք, 784 քահանայ, 334,157 արական, 297,250 իգական. ընդամենայն 631,407 ծխական: Մի եկեղեցուն ընկնում է 968 ծխական, մի քահանային 805 ծխական: 652 եկեղեցին ունին միասին 192,105 ու.—95 կոպ. դրամադուլա, 57,077—41 մուտք, 48,461—26 ելք: 18 վանքը միասին ունին 722 ոււր. դրամադուլա, 9528—55 մուտք, 10221—55 ելք:

\*) Թէ իւրաքանչիւր թեմում ինչ վանքեր և իւրաքանչիւրն քանի՞ դեռեատին կամ սրբան արդիւնք է բերում—տեսնել Տ. Մխիթար վարդապետի «Հայերը Ռուսաստանում» գրքում:

Բ. Ղարաբաղի թեմում կայ 217 եկեղեցի, 7 վանք, 220 քահանայ, 98651 արական, 80860 իգական՝ ընդամենայն 179,511 ծխական: Մի եկեղեցուն ընկնում է 827 ծխական, մի քահանային 816 ծխական, 220 եկեղեցին միասին ունին 35,953 ո.—93 կ. դրամագլուխ. (մուտքը և ելքը ճիշտ չլինելով՝ չգրվինք այստեղ):

Գ. Վրաստանի և Իմերեթի թեմում կայ 369 եկեղեցի 14 վանք, 366 քահանայ, 174,071 արական 153,703 իգական, ընդամենայն 327,774 ծխական: Մի եկեղեցուն ընկնում է 887 ծխական, մի քահանային 888 ծխական: 369 եկեղեցին միասին ունին 228,769 ո. 53 կ. դրամագլուխ, 72,732 ո. 53 կ. մուտք, 88,282 ո. 68 կ. ելք: 14 վանքն ունին 978 ո. 86 կ. դրամագլուխ, 6175 ո. 12 կ. մուտք, 8723 ո. 71 կ. ելք:

Դ. Աստիսանի թեմը ունի 31 եկեղեցի 1 վանք, 52 քահանայ, 20,397 արական 18,604 իգական ընդամենայն 39,001 ծխական: Մի եկեղեցուն ընկնում է միջին թուով 1258 ծխական, իւրաքանչիւր քահանային 750 ծխական: 31 եկեղեցին միասին ունին 537,963 ո. 8 կ. դրամագլուխ: Մուտք 49,312 ո. 17 կ. և ելք 100,130 ո. 50 կոպ.:

Ե. Բեսսարաբիայի թեմում կայ 44 եկեղեցի 3 վանք, 57 քահանայ, 18,996 արական, 18,447 իգական, ընդամենայն 37,443 ծխական: Մի եկեղեցուն ընկնում է միջին թուով 851 ծխական, իւրաքանչիւր քահանային 657 ծխական. 44 եկեղեցին միասին ունին 690,745 ո. 27 կ. դրամագլուխ, 224,105 ո. 59 կ. մուտք, և ելք 209,847 ո. 88 կ.:

Զ. Շամախու թեմում կայ 38 եկեղեցի, մի վանք, 42 քահանայ, արական 24,896, իգական 23,463, ընդամենայն 48,359 ծխական: Մի եկեղեցուն ընկնում է 1273 ծխական, մի քահանային 1151 ծխական: 38 եկեղեցին ունի 92,254 ո. 52 կ. դրամագլուխ, 21,746 ո. 91 կ. մուտք և 16,325 ո. 74 կ. ելք:

Այսպիսով Ռուսաստանի 6 Հայ—Լուսաւորչական թեմում կայ 1351 եկեղեցի 44 վանք 1521 քահանայ: 1,263,495 ծխական: 1351 եկեղեցին միասին ունին 1,777,792 ուրբլի 28 կոպ. դրամագլուխ:

Իսկ Տ. Միխթար վարդապետի քաղած տեղեկու-



թեանց\*) համաձայն 1907 թուի սկզբին Ռուսաստանի վեց Լուսաւորչական Հայոց թեմերում եղել է ընդամենը 1,392,129 ծխական ըստ այսմ.—Երևանի թեմում—668,813, Թիֆլիսի թեմում—372,800, Ղարաբաղի թեմում—175,632, Շամախու թեմում—62,649, Աստրախանի թեմում—60,842 և Նոր-Նախիջևանի և Բևաթարբիայի թեմում—51,393:

**Պ Ա Տ Կ Ե Ր**

Մտից գումարաց գանձարանի Մ. Աթոռոյ 1898, 1899, 1900 և 1902 տարիներին:

1898 թ.

Մնացորդ 1907 թ. 3476|03, Կալուածական 69655|66 վիճակային 8394|01., Հոգեբաժին սրահահարկ 6320|48, Պտղի 1468|91, Ուխտատեղիներից 2960|81, Տպարանից 14041|06, Ագարակի 724|10, Մ. Տաճարի մոմավաճառումից 261, Լուսազին, 1056|71, Պատահական 6346|42, Յօզուտ ձեմարանի 5823 ո. Գանձանակ Մ. Աթոռի 2952|98: 0/0|0 արժէթղթոց Մ. Աթոռի 19788|13, Տուգանադրամ 5 ոււր. ընդամենայն մուտք, 1898 թ.ում 143,274 ոււր. 30 կ:

1899 թ.

Մնացորդ 1908 թ. 6265|44. Կալուածական 62968|17, վիճակային 7001|49, Հոգեբաժին 8351|72, Պտղի 970|22, Ուխտատեղիներից 6234|67, Տպարանի 24714|90, Ագարակի 604|53, Մ. Տաճարի մոմավաճառութիւնից 156|16, Դարբաս 211|50, Պատահական 17,320|51 Յօզուտ ձեմարանի 14,088|65, Գանձանակ Մ. Աթոռի 2339|97, Հին հանդերձների վաճառումից 266|30, 0|0|0 արժէթղթոց Մ. Աթոռի 10030|16, Տուգանադրամ 20 ոււր. ընդամենայն մուտք 1899 թ. ընթացքում 171,285 ո. 58 կոպ:

\*) Տես Первая всеобщая перепись населения российской империи 1897 г., под редакцію Н. А. Тройницкаго, С. Пет. 1905. որից հայերի վերաբերեալ վիճակագր. տեղեկութիւններ քաղել է Տ. Մխիթար վարդապ. իւր «Հայերը Ռուսաստանում» գրքի մէջ:

1900 թ.

1899 թ. մնացորդ 8612 ո. 45 կ., Կալուածական 47850|34, Վիճակային 6329|21, Հողերածին 8247|74, Պողի 1696|34, Ուխտատեղեաց 9092|22, Տպարանի 14585|46, Ագարակի 1020|55, Մայր Տաճարի մումավաճառուժից 268|51, Լուսազին 1163|80, Դարբաս 222|20, Պատահական 16453|35, Յօգուտ ձեւարանի 6032|50, Գանձանակ Մ. Աթոռի 2124|46. Հին հանդերձների վաճառուժից 56 ո. 0|0 0|0 արժէթղթոց Մ. Աթոռի 19274|19, Տուղանադրամ 19 ուր. ընդամենայն մուտք 1900 թ. ընթացքում 143,048 ուր. 35 կոպ:

1902 թ.

1901 թ. մնացորդ 2727|31, Կալուածական 80745|54, Վիճակային 12178|73, Հողերածին և պակահարկ 16827|12, Պողի 2565|43, Ուխտատեղեաց 7852|41, Տպարանի 11318|79, Ագարակի 1974|76, Մայր Տաճարի մումավաճառութիւնից 299, Լուսազին 1057|27, Դարբաս 330|20, Պատահական 3520|30, Յօգուտ ձեւարանի 15,707|29, Գանձանակ 1420|22, Հին հանդերձների վաճառուժից 45|70, 0|0 0|0 արժէթղթոց Մ. Աթոռի 14686|29, Պատահական 42|45, ընդամենայն մուտք 1902 թ. ընթացքում 173,298 ո. 81 կոպ:

### Մ. Աթոռի դրամագումարն ու աւանդադրամները.

Մ. Աթոռի գանձարանի հաշուեկշիւից երեւում է՝ որ առ 1-ն Հոկտեմբերի 1908 թ. գանձարանում կար Ա. Մայր Աթոռի գումար. ա) պատրաստի դրամով 5684 ո.—21 կ, բ) 0|0 0|0 թղթով 388,264 ընդամենայն 393,948 ո.—21 կոպ:

բ. Աւանդապահութեան, ա) պատրաստի դրամով 20,483—17 բ) 0|0 0|0 թղթով 50,095 ո.—42 կոպ. ընդամենայն 70,578 ո.—59 կոպ:

Մ. Աթոռի և աւանդապահութեան գումար առ 1-ն Հոկտեմբերի 1908 թ. գանձարանում կար ընդամենը 464,526 ո.—80 կոպէկ:

